

مسرحية

عفاريت نص سوي

تأليف

هاني مهران

شخصيات المسرحية

شهریار

شهرزاد

التربی (حارس المقابر ، غفير الترب)

العفريت

أم كالوشة

كالوشة

المحقق

المتهم (حسن)

نعیمة

شلةالصحاب الحشاشین :

شلبی

شكشك

محسن

مديح

حراميةالجثث :

خشبة

مشرط

الدكتور

العائلة المتسولة :

الزوجة

الزوج

يوسف

البنات الأصدقاء :

ندى

رحمة

ليلي

الشرطة :

الضابط (الضابط)

العسكري

عائلة الزيارة :

آية

على

عبدالله

الجبالي

مصطفى

يوسف

من الجيران :

المرأة

المكان الذى تدور فيه أحداث المسرحية

_ المكان عبارة عن مقابر فى حوش كبير

هناك أكثر من شاهد تتوزع بشكل يتيح للحركة المسرحية حرية التعبير والتصرف ولكن هناك شواهد (مقابر) أساسية وهى : شاهد يمين المسرح من الأمام على مقدمة المسرح (الأفانسيه) ، شاهد فى الجهة المقابلة على يسار المسرح

وشاهد (مقبرة) رئيسى فى أعلى وسط المسرح وهو المكان الذى يجلس عليه شخصيات المسرحية فى كل المشاهد ويتم استخدامه بأكثر من صورة على حسب المشهد

وهناك زرع صبار متفرق بجوار كل شاهد مقبرة كما يظهر السور فى الخلفية به بعض الكسور والهدم ويظهر الطوب الأحمر من لون السور

كما يوجد بوسط السور مكان للسلويت يظهر فيه الخيالات والعفاريات وشكل تجرىدى لأى لوكيشن مختلف ويجب أن يكون جزء من السور ولا يلاحظ إختلافه عن السور إلا عند إستخدامه فقط فى المشاهد التى يستخدم فيها بؤر إضاءة

وتكون للأحداث التى تجرى شكلا خارج الحوش كشقة ندى أو مكتب التحقيق يوجد سلم فى نهاية المسرح يستخدم للنزول داخل المقابر .. تدخل فيه بعض شخصيات المسرحية وتخرج منه

اللوحة الأولى

(يدخل شهر يار فى حالة فرح يرتدى ملابس ملكية وينتظر شهر زاد .. تدخل شهر زاد بعد لحظات ترتدى فستان ملكى وتاج على رأسها .. تتفقد المكان فى حالة استغراب)

شهر زاد: (غاضبة) ممكن أعرف جايينى هنا ليه؟

شهر يار: (يذهب للجلوس على الشاهد ويضع قدم على قدم)
إنتى مش بتقولى عايزة تخرجى .. تغيّرى جو .. تشوفى حاجة جديدة ما شفتهاش قبل كده .. حاجة ما تكونش أميرات العالم شافوها أو زاروها

شهر زاد: (تذهب إليه) تقوم تحيبنى المقابر يا شهر يار

شهر يار: عشان تعرفى قيمة الحياة .. وعشان تعرفى كمان إنى بعاملك معاملة خاصة غير اللى قتلتهم قبلك

شهر زاد: يعنى إنت جايينى هنا عشان تذلى .. (بغضب) مش كفاية مستحيلة الهم اللى أنا فيه!

شهر يار: (يقف غاضبا) هم إيه يا شهر زاد .. إنتى كل حاجة بتطلببها بتيجى .. اللى بتحلمى بيه بيتحقق .. إنتى عندك كل حاجة ومش حارمك من أى حاجة

شهر زاد: مش حارمنى من أى حاجة؟! يا شهر يار أنا بقالى يومين ماجبتش أدوات ماكياج جديدة (ميكب)

شهر يار: وفلوس الضرايب اللى إديتهالك من إسبوع عملتى بيها إيه؟

شهر زاد: جبت بيها فساتين

شهر يار: وفلوس غرامات المرور اللى إديتهالك إمبارح؟

شهر زاد: جبت بيها شنط وجزم جديدة

شهر يار: وفلوس الكهرباء ورسوم النظافة

شهر زاد: جبت هدية لواحدة صاحبتى

شهر يار: (يقف فوق مقبرة) ده اسمه تبذير يا هانم .. إنتى لازم تعرفى إن كل بنات العالم يتمنوا اللى إنتى فيه .

(يخطب فيها كأنه رئيس يخطب لشعبه)
وبعدين أجيالك فلوس منين لطلابك اللى مبتخلصش .. أسرق!؟

مش كفاية الضرايب اللى كل شوية بفرضها على الناس بسبب وبدون سبب ..
غرامات المرور اللى بنفرضها على الناس وإحنا أصلا ماعندناش عربيات فى المملكة ..

(يحكى) الشهر اللى فات لمينا تبرعات من الشعب وقلنا لهم هنعلمكم مستشفيات
وخذتى الفلوس سافرتى بيها جزر الكاريبى..

عملنا صندوق تحيا السلطنة .. وبنيتك قصر جنب بيت حماتى عشان تونسيها وتبقى
قريبة منها .. وكل ده ليه؟!!

(ينزل لمواجهتها) .. عشان شوية حواديت بتسلى بيهم لأنى معنديش إشتراك bein
sport .. ماكانوش شوية حواديت اللى تخلىنى أبيع شعبى

شهر زاد: (بدلع) أنا عندى حدوتة جديدة

شهر يار: (بحزم) بكرة الصبح نلم تبرعات عشان نعمل كبارى فى المملكة ..
(بحنية) ونجيب الماكياج

شهر زاد: (تذهب للجلوس على المقبرة) .. وعازية أسافر أوروبا.. أزور صاحباتى

شهر يار : (يذهب لها ليقلم أظافرها) .. وليه التعب ده؟! .. إحنا نعلن عن مؤتمر
لمكافحة الكائنات الفضائية ونجيب كل الملوك يقضولهم إسبوع ولّا حاجة ..
وزوجاتهم والأميرات يكونوا هنا معاهم .. وتشوفهم براحتك ..

بيتهىالى كده تبقى كل حاجة تمام .. ونفسيك إرتاحت وتقدرى تحكى الحدوتة
براحتك

شهر زاد : (تقف) أحكيها هنا؟!!

شهر يار: (يقف) .. أهو تجديد .. عارفة ؟ (يتفقد المكان بشغف)
المكان هنا بيعرفنى قيمة النعمة اللى أنا فيها .. قيمة كل حاجة فى إيديا دلوقت لأنى

كنت محروم منها زمان .. إوعى تفتكرى إنى اتولدت لقيت نفسى كده .. شهريار..
لأ .. أنا ياما عانيت وتعبت لحد ما وصلت للى أنا فيه ..

أنا زمان كنت مجرد (يوم يار) صغير .. لكن عشان عندى حلم قررت أبقى
شهريار .. عشان كده حاسس بالناس الغلبة وبشاركهم الحاجة اللى بيحبوها.. إنهم
يسمعوا حواديت .. عشان كده خلّيت الحواديت أهم حاجة فى المملكة .. إحكى يا
شهر زاد .. إحكى

شهر زاد: (تجلس على المقبرة) بلغنى أيها الملك السعيد .. ذو الرأى الرشيد ..
والعمر المديد...

(موسيقى مع بداية الكلام شهر زاد _ يذهب شهريار ليجلس بجوار قدميها)

(بلاك تدريجى)

(دخول موسيقى رعب كفاصل)

اللوحة الثانية

(يدخل التربي (حارس المقابر) يرتدى جلباب وكالسون _رجل فى أواخر
الأربعينات لكن يظهر عليه العجز و الهم .. فى حالة إستيقاظ من النوم)

التربي : (يتثاوب) ياااااااااااه .. (مخاطبا المقابر) .. صباح الخير ياللى سبقتونا
لدنيا أحسن ..أنتم السابقون ونحن اللاحقون .. خليكُم مستريحين كدة .. وإحنا طالع
عين اللى خلفونا

(يشعر بالشمس فى عيونه)

إيه ده ؟ هو برده الشمس طلعت النهاردة

(يخاطب الشمس) إنتى مابتز هقيش .. كل يوم .. كل يوم كدة .. مافيش مرة تاخدى
أجازة ولا حتى بدل راحة

عارفة .. إنتى بتفكرينى بنفسى أيام شبابى .. كنت أحب أصحى كل يوم أروح
الشغل .. كل يوم كل يوم كل يوم كدة .. لحد ما زهقت وعرفت إن مافيش فائدة ..
إنما لما إشتغلت هنا .. بقت كل الأيام شبه بعضها .. حتى لو نمت 3 أيام ماحدث
هيحس بفرق ولا أنا هحس إن فيه حاجة إتغيرت ..

(يجلس على الأرض)

الوحدة بتخلى الواحد زى البيت الوقف .. لاحد بيسكنه ولا بيفيد حد ولا ليه أى
لازمة فى الحياة ..
(يقف غاضبا)

وبعدين أنا بكلمك ليه ؟ .. هو أنا مجنون عشان أكلم الشمس .. أنا أروح أغسل وشى
وأدور على حاجة أكلها .. وبالمرة أصبّح على الكولدير الخربان اللى قدام باب
الترب

أصله صاحبى .. بقاله هنا 16 سنة .. من ساعة ما جيت هنا وهو مانزلش نقطة
مية واحدة .. ولا حد فكر يشرب منه .. بحس إنه صديقى الوحيد الأنتم

(يتدارك إنه فى حالة غياب عن الوعى)
واضح إن حنة الحشيش اللى لقيتها إمبراح وشربتها حنة كفاءة .. آخر حلاوة ..
(يخاطب الأموات)

مش عارف أنا بتجيبوا الحشيش منين .. مين المدعى اللى بتستقضوا منه .. تلاقىكم
قاعدين متنغنين وآخر قلة .. إنما إحنا فى غم وقرف ومشاكل وبلاوى كل يوم ..
إنتم عايشين مع كل الناس الطيبة بتاعة زمان .. أيام الخير .. إنما إحنا ضايعين ..
ورغم إنى بعدت عن الناس وقرفهم لكن برده تحس إنك بتتنفس قرف ورخامة
ونطاعة وقلة ضمير
(يضبط مكان الزرع وينفضه من التراب ويمسح المقابر)

هنا أحلى مكان .. عارف ياض يا ميت إنت وهو وهى .. رغم حركاتكم النص كم
وشغل العفاريات بتاعكم .. لكن خلاص أخذت على كدة .. حتى الواد العفريت
الصغير اللى لقيته عايز يهرب من على سور التراب ومسكته 3 مرات .. رغم إنه
تعبنى لكن خلاص خدت على كدة ..

(يذهب لخلف مقبرة يأتى ب " جوزة " ويجلس ليشرب منها _ ويضع فيها حشيش
_ ويكمل حديث مع الأموات)

ومرة طلعلى عفريت وحاول يرخم عليا .. رحت مسكته .. ظبطته وإديته كشافين
على وشه على كام شلوت .. قعد بقى بيرطم ويقولى أنا هوريك .. وحياة أمى مش
عارف هعمل إيه ..

(يقف وكأنه بالفعل يخاطب عفريت)

ياللا ياض من هنا .. بقى عايز تهرب من التراب وأسيبك تروح تقرف الناس الغلابة
عن ما هى قرفانة .. دا أنا لو مسكتك تانى هنفخك .. أنا بس أسيب أم الدنيا دى ..
وأجيلكم .. وأشوف النعيم وأقابل الناس الطيبين
(نسمع صوت من الخارج .. له صدى)

الصوت: عايز تشوف الخير وتجرب النعيم .. وتقابل الناس الطيبين

التربى: وحد يكره؟! .. فىن؟

الصوت: تعالى هنا ..

(يقف التربي ويبحث عن الصوت ويقترب من السلم الخلفى للمقابر)

الصوت : أيوة هنا .. تعالى .. هنا النعيم كله ..

(يضع التربي قدم للنزول)

الصوت : بس إستنى .. عشان تروح للنعيم والخير .. وتقابل الناس الطيبين لازم
تقلع هدومك

التربي: لازم موضوع الهدوم ده؟

الصوت: طبعاً .. عشان تتجرد من متاع الدنيا

التربي: طالما هقابل الناس الطيبين وأشوف النعيم .. مافيش مشكلة .. نقلع
(يقوم التربي بخلع الجلابية والصدىرى _ ويأخذ ال "جوزة" _ ويعود لمكان السلم)

الصوت: أدخل برجلك اليمين بقى

(ينزل التربي للسلم وعند إختفائه من المسرح نسمع صوت ضرب)

التربي: آآآآاه .. آآآآاه .. آآآآاى

الصوت: عشان تضربنى كشافين على عيني .. أنا جبتلك أصحابى يوضّبوك

(نسمع صوت الضرب ثم موسيقى)

اللوحة الثالثة

(يدخل مجموعة من ثلاثة شباب (الحشاشين) يرتدون ملابس عصرية
أعمارهم من 18 إلى 22 سنة .. يتقدمهم شكشك .. بينما يدخل على استحياء
الآخرين _ شلبى فى حالة خوف)

شكشك : ها .. إيه رأيكم ؟
(يفرش ملائه على الأرض ليجلسوا عليها)
شكشك : هنا نعمل أحلى دماغ من غير ما حد يضايقنا ولا يعرف إننا هنا أصلا
محسن : فكرة الترب فكرة هائلة .. أحسن حاجة إننا بعيد عن الناس .. وبعيد عن
كل الدوشة اللى فى العالم كله
شلبى : المكان هنا هيعمل معانا أوفر دماغ .. مفيش أحلى من الهدوء .. وغير كدة
(ينتبهان له) .. مافيش أحلى من الهدوء
شكشك : الواحد ما بيصدق يفضى دماغه من المشاكل .. الهموم فى الدماغ بقت
أكثر من الميكروباصات على الطريق .. كل هم وله طريق وكله عايز يوصل فى
دماغك الأول .. المشكلة إن مفيش إشارات توقف أى هم
شلبى : بقولكوا إيه إحنا جايين ننبط .. وغير كدة (ينتبهان له) .. إحنا جايين ننبط
شكشك : عندك حق .. إحنا جايين ننبط .. بس نخلى بالناس بلاش صوت على ..
غفير الترب لو شافنا هيعمل معانا الجلاشة
محسن : خلى انت بالك لأنها بتقلب معاك بضحك ومش بتبطل غير لما نفصلك
شكشك : لأ .. أنا مش عايز حد يفصلنى .. دا أنا هنا خفيف ونسيت كل حاجة ..
سيبونى أضحك
(يضحك .. فيضحكون)

شلبى: عارفين أنا خايف من إيه؟

شكشك: من إيه ؟

شلبى: من العفاريت .. (يضحكون) .. فاكرين وإحنا صغيرين لما نقعد نحكى
حكايات تخوف.. وغير كدة (ينتبهان له) .. كنا نحكى حكايات تخوف

محسن : أصلا كل الحكايات تخوف .. أبو رجل مسلوخة .. أمنا الغولة

شكشك : دا حتى بكار كان بيخوفنى وأنا صغير .. كنت فاكرهم عفاريت صغيرة
جوا التليفزيون .. أمى كانت بتقول لو مأكلتش .. مشرط رئيس العصابة هيجى
يخطفك

شلبى : (يضحك)

محسن : هى دى حاجة تضحك .. دى حاجة تغم الواحد زيادة .. إحنا جيل ملعوب
فى دماغه

شكشك : بلاش ملعوب فى دماغه دى .. خلينا محترمين .. أنا ماحدش يقدر يلعب
فى دماغى

الجميع: (يضحكون)

شكشك : وطوا صوتكم .. فيه واحدة ماتت هنا محروقة الإسبوع اللى فات .. وربنا
ما يوريكم موة الحرقان .. إسمها أم كلوشة .. ممكن تسمعنا

محسن: يعنى ممكن يطلعنا عفريتها ؟

شلبى : لا ما تفلتش مافيش عفاريت بتطلع للمحروقين.. وغير كدة (ينتبهان له) ..
مافيش عفاريت بتطلع للمحروقين

محسن: طيب بلاش نجيب السيرة دى عشان الواحد جنته مش خالصة

شكشك: تمام .. إحنا نشغل الأغانى ونلف السيجارتين ونفصل عن الدنيا .. ساعتها
بقى ولا عفاريت ولا حد يعرف يفصلنا

محسن :يا نهار أبيض .. إحنا نسينا "الصباية" على القهوة

شلبى : مش مهم بقى

شكشك: لا .. دا أهم حاجة الأغاني .. زى ما الحشيش بيودينا دنيا تانية .. الأغاني
بردوبتودينا وتجيبننا وتنسينا الهم شوية

محسن : خلاص هروح أجيبها فى السريع وآجى (يقف ويهم بالخروج ثم يرجع)
أنا خايف أروح لوحدى

شكشك : خايف .. مش عيب على طولك .. روح يا إبنى معاه .. وأنا هستناكم هنا
(يخرجان .. نسمع أصوات غربان وديابة .. يخاف ويحاول التحرك ثم يذهب فى
اتجاه مكان خروجهم .. لينادى عليهم ..)

شكشك : ياااشلبى .. ياااااااااااااااااااا محسن ..

(يدخلون مرة أخرى)

محسن : فی ایہ؟

شكشك: أنا خايف أقعد لوحدي أم كلوشة تطلع علي .. أصلها ماتت مشنوقة

شلبى: ماتخافش أم كلوشة ماتت مشنوقة وما فيش عفاريت بتطلع للمشنوقين

محسن: أنا اللي هقعد هنا.. روحوا إنتم هاتوا "الصباية"

شكشك : يا إبنى مش إنت اللي كنت خايف تروح لوحدك من شوية

محسن : لا .. أنا فكرت ولقيت نفسى مش خايف .. وكمان أنا محتاج أقعد لوحدى شوية .. وأهو بالمرة أحجز المكان .. النهاردة الوقفة والدنيا بتبقى زحمة جدا ويمكن نلاقى مصر كلها هنا

شكشك وشلبی : سلام

(یخر جان _ یجلس یغنی مع نفسه .. فیخرج له مدیح _ شاب یرتدی بالطو طویل
قدیم جدا)

مدیح : سلامو علیکم

محسن : وعلیکم السلام .. أستاذك المكان ده محجوز

مديح : محجوز؟!

محسن : آه .. وبعدين المكان لسه ماتزحمش .. يعني انت ممكن تحجز هنا أو هنا

(يشير له فى كل جانب)

مديح : إنت شكلك جديد هنا ؟

محسن : فعلا .. أصحابى جابونى هنا وسابونى

مديح : وأنا كمان .. جابونى هنا وسابونى

محسن : خلاص .. يبقى نقعد ندرش لغاية ما ييجوا .. وأهو نتسلّى سوا

مديح : تمام جدا .. بس القعدة هتحتاج 2 شاي .. هروح أجيبلك 2 شاي من أم كالوشة وأجى

محسن : (بإستغراب وخوف) أم كالوشة؟!!

مديح : آه .. دى واحدة هنا عاملة فرشة بتبيع شاي وقهوة .. بتقلب عيشها .. انت مستغرب ليه ؟

محسن : (يضحك) أصل صحابى قبل ما تيجى كانوا بيقلوا إنها ماتت محروقة ومشنوقة .. لدرجة إنى خفت فى الأول من إن عفريتها يطلعنا (يضحك ويجلس)

مديح : (يضحك) إنت بتخاف من العفاريت؟!!

محسن : (يضحك) آاه هههههه

مديح : أنا زمان كنت بخاف برده من العفاريت .. لكن من بعد ما مُت وأنا مش بخاف منها خالص

محسن : (يقف مفزوعا) من بعد إيه؟!!

مديح : من بعد ما مُت ..

(محسن لا يستطيع أن يتكلم أو يتحرك أو يهرب ويتسمر مكانه فى حالة خوف شديد _ وتتخط قدمه)

مديح : إنت مالك ؟ .. هما مش الناس جابوك وسابوك .. (بيكى) .. أنا برده

جابونى وسابونى .. إنت مش بترد ليه ؟

.. طب أنا هروح أجيب الشاي ونرجع نتكلم .. سلام .. إستمتع .. (يخرج مديح)

محسن : (ينظر ليتأكد أنه خرج من المكان يجرى ويصرخ إلى الخارج)

اللوحة الرابعة

(يدخل "خشبة" حرامى جثث متمرس خبرة فى سرقة الجثث _ يتسحب ويتفقد المكان)

خشبة : يا فتاح يا عليم يا رزاق يا كريم .. يارب وفقنا وإرزقنا وإسترنا يارب .. (يلتفت حوله ولا يجد أحد) ..

خشبة : (ينادى) يا مشرط .. يا مشرط .. إنت فين ؟ .. خش يا إبنى ماتخافش .. هو إحنا بنسرق ..

إدخل برجلك اليمين وقول دعاء دخول الترب

(يدخل مشرط حرامى فى الأتوبيسات يرتدى شنطة حضانة بها أوراق ودوسيهات .. وأول مرة يسرق جثث فى حالة رعب)

مشرط : يارب .. (يدخل فى حالة رعب) بقولك إيه أنا خايف أوى .. ما بلاش منها الشغلانة دى

خشبة : بلاش إيه بس .. بقولك كل حاجة متظبطة .. دا أنا بعمل الشغلانة دى فى وقت الفراغ بتاعى .. وبعدين جثة واحدة نسرقها بمقام كل الاتوبيسات اللى هتسرقها فى سنتين ثلاثة

مشرط : بينى وبينك موضوع الجثث ده ملبشنى .. وحاسس إنى هعملها على نفسى

خشبة : لا بلاش تعملها هنا عشان الميتين مايغرقوش .. (يحاول أن يشجعه) وبعدين هو ده مشرط أبو قلب أسد .. (مشرط يؤدى حركة استعراضية)

خشبة : أبو عقل تعلب (مشرط يؤدى حركة استعراضية) .. أبو عين صقر .. (مشرط يؤدى حركة استعراضية) أبو إيد نسناس .. اللى يسرق الناس قبل ما ترمش عنيا ومايخفش من أى حاجة فى الدنيا .. غير الصراصير

مشرط : (يقفز مفزوعا من الصراصير) .. ياعم أنا بسرقت ناس عايشة .. إنما الميتين دول ماعرفش ممكن يعملوا إيه ؟

خشبة : هيعملوا إيه يعنى ؟ .. ولا حد هيصوت ولا حد هيقفش فيك ويلم عليك الناس

مشرط : (يحاول أن يطمئن نفسه) يعنى الشغلانة مضمونة ؟

خشبة : ضمان رجال الأعمال

مشرط : يعنى رحنا فى داهية

خشبة : لأ .. رجال الأعمال الكبار اللي بياخدوا الفلوس ويهربوا ولو إتقفشوا يتصالحوا على طول بنسبة من الفلوس

مشرط : آآآآآآآآ .. طب وفكرك إحنا يعنى لما ... (يقاطعه)

خشبة : الموبايل بيرن .. يبقى الدكتور وصل (يخرج الموبايل) .. ألو .. أيوة يا دكتور .. أنا عند رجل الغراب .. إنت فين ؟ .. عند جناح الغراب .. طب أدخل من بق الغراب هتلاقينى

مشرط : (يحاول الهروب بخوف ويتراجع) .. طب أنا ممكن أستناكم عند عش الغراب لما تخلصوا

خشبة : لأ .. إنت هتنزل معايا بطن الغراب .. ونشيل القوانس سوا ونتكل على الله .. أنا ما أقدرش أشيل القونصة لوحدى عشان كدة جبتك معايا .. بدل ما أجيب حد غريب .. إنت صاحبي من زمان وزيتنا فى دقيقنا

مشرط : (يخرج دوسيه من الشنطة) .. طب خذ بقى الملف بتاع مواصفات الجثة وإتعامل إنت معاه لأنى ماعرفش أتعامل مع ناس نضيضة ومحترمة

خشبة : عشان كدة إحنا أصحاب من زمان ... ماشى .. (نسمع صوت كلاكس عجلة) ..

خشبة : كدة الدكتور وصل .. إتفضل يا دكتور

(يدخل الدكتور يرتدى بالطو طبيب على عفريته ميكانيكى ومعه شنطة هاند باج كبيرة)

الدكتور : وحدوووووه

الجميع : لا إله إلا الله

مشرط : دكتور ده ولا حانوتى ولا ميكانيكى ولا إيه بالطبط ؟

الدكتور : شطب يور ماوس

مشرط : (ينفعل ويخرج مطوة) هو بيغلط ؟

خشبة : لا مابيغلطش

مشرط : لو بيغلط .. ربنا يسامحه .. خاينا نخرج من هنا على خير

الدكتور : جيف مى ذا ريبورت

مشرط : (ينفعل ويخرج مطوة) هو بيغلط ؟

خشبة : لا مابيغلطش

مشرط : لو بيغلط .. ربنا يسامحه

خشبة : إتفضل يا دكتور التقرير (يناوله الملف)

مشرط : ماشاء الله .. إنت ليك فى اللغات

خشبة : يا ابنى أنا جايب فى الثانوية العامة 97 و 3 من 10 %

مشرط : وإيه اللي حدفك على الشغلانة دى

خشبة : التنسيق .. كنت عايز أدخل طب .. بس مالحقتش .. قلت أشتغل فى

الجثث وماخليش المجموع يآثر عليا

الدكتور : شطب .. خلونا فى الشغل .. أنا وقتى بفلوس .. أنا كان زمانى كتبت

مذكرة لمتهم وخرجته من السجن براءة وأخذت الأتعاب وأنا واقف

مشرط : ياعم إنت جايبلنا دكتور فاتح مكتب محاماه بدل العيادة .. جايبه منين ده ؟

خشبة : جايبه من الورشة بتاعته .. مطلعته من تحت العربية

الدكتور : كل دقيقة تأخير ب 1500 جنيه زيادة

خشبة : لاااااا وعلى إيه .. إتفضل يا دكتور (يناوله الملف)

الدكتور : (يمسك بالملف ويقرأه) المواصفات المكتوبة هنا مواصفات نادرة جدا .. بس ملائمة للجثة اللى هنا ..

(يذهب إلى أحد المقابر)

الدكتور : أم كالوشة وائل عبدالله .. جرين آيس .. عين زرقا .. بلاك هير .. شعر أصفر .. بيج ماوس .. أنف صغيرة

(أثناء سرد المواصفات .. يدخل مديح يتصنت عليهم .. ثم ينام فى الخلف أمام أحد المقابر)

خشبة : بس إحنا عايزين جثة راجل مش جثة ست .. والمواصفات اللى جوا هي الأهم

مشرط : ياعم راجل ولا ست مش فارقة خلينا نخلص ونمشى من هنا

خشبة : بس إنت هي محفظة هناخدها ونمشى .. مافيش حتة تانية قدامك تكون مناسبة يا دكتور ؟

الدكتور : (يتحرك من مكانه ويبحث ليجد جثة مديح على الأرض) أوكى .. ذا أناظر بادى إن هير .. إتفضلوا .. لاديز فيريست

مشرط : (ينفعل ويخرج مطوة) هو بيغلط ؟

خشبة : لا مابيجلطش

مشرط : لو بيغلط .. ربنا يسامحه

الدكتور : غريبة .. الجثة دى مش فى كشف الجثث اللى انا عامله .. دا انا مخلي واحد يراقب كل خشبة داخله هنا ويبيعتلى بياناتها .. شكلها جديدة هنا .. لازم أكشف عليها الأول

مشرط : ياعم إنجزنا بدل ما أعملها معاك .. ولخص بقى يا مستر

الدكتور : مستر ؟ .. شطب يور ماوس آند جيف مى ماى باج

مشرط : (ينفعل ويخرج مطوة) هو بيغلط ؟

خشبة : لا مابيجلطش

مشرط : لو بيغلط .. ربنا يسامحه

خشبة : خلاص بقى يا مشرط .. (يذهب هو ويحضر الشنطة ويعطيها للدكتور)
(الدكتور يخرج من الشنطة عدة حلاقة .. يضع الفوطة على مديح ويخرج مقص
ومشط فى يده وماكينه حلاقة كهربا)

مشرط : هو ده دكتور ولا حلاق ولا ميكانيكى ولا محامى ولا إيه بالظبط ؟
خشبة : دكتور يا أخى .. بس بيحسن دخله .. المعيشة صعبة

(الدكتور يفعل مع الجثة كما يفعل الحلاق ثم يخرج من الشنطة كوريك عربية
ومفتاح إنجليزى وبنام بجوار مديح وكأنه يقوم بإصلاحه)

الدكتور : (بعد إنتهاء الفحص) فرى فرى نايس .. إتس أوكى
مشرط : (ينفعل ويخرج مطوة) هو بيغلط ؟

خشبة : لا مابيغلطش

مشرط : لو بيغلط .. ربنا يسامحه

خشبة : إفرد الشوال بقى عشان ناخذ الجثة ونمشى

(بينما يقوم مشرط بإستخراج الشوال .. مديح يتحرك ثم يقوم وكأنه مستيقظ من
النوم .. بينما هم جميعا فى حالة رعب وهلع ويصرخون)

مديح : عجبتم جتتى ؟

الجميع : (يصرخون .. ويخرجون)

اللوحة الخامسة

(تدخل الزوجة امرأة شابة فى أواخر العشرينات _ترتدى جلابية قديمة بها رقع _ يظهر من منظرها أنها متسولة)

الزوجة : (تجلس على المقبرة وتخرج من كيس بلاستيك فلوس فضة كثيرة وجنيهاات ورقية _ تنظر بجوارها وكأنها تبحث عن أحد _ تمشى تجاه باب دخولها وتنادى)

الزوجة : (تنادى) يا يوسف .. يا واد يا يوسف

(يظهر يوسف برأسه فقط وكأنه يخشى الدخول للمقابر)

الزوجة : يا واد خش .. خلىنا نشوف هنعمل إيه عشان نروح فى اليوم الغبرة دهون

يوسف : (من الخارج) يا أمّه أنا خايف من العفاريات

الزوجة : عفاريات إيه يا واد إنت .. ما عفريت إلا بنى آدم (تعود لمكانها وتجلس) بقى خايف من العفاريات ومش خايف من أبوك .. دا لما يجيلك هيشلوحك

يوسف: (يدخل يوسف _ طفل 7 سنوات _ يظهر من ملابسه أنه متشرد وويرط رأسه بشاش كأنه مصاب _ معه ستة مناديل ناقصة)
يوسف : أنا معملتش حاجة

الزوجة : ما عشان معملتش حاجة دى .. بقى تقعد طول النهار .. تتنطط فى الأتوبيسات وتبيع بس .. كيسين مناديل .. ليه ؟ .. الناس بطلت تنف ؟ .. وراجلى بجنيه ونص .

(يدخل الزوج على جملة "جنية ونص") _ رجل فى الأربعينات _ نشال _ له ذقن غير منضبطة ويرتدى نظارة شمس _ وقميص وبنطلون)
يوسف : (يجرى ويختبأ خلف أمه بمجرد دخول الأب)

الزوج : (يحاول الوصول ليوسف)
الزوج : (فى حالة صدمة) جنيه ونص؟! .. جنيبيبيبيبي ونص .. جنيه ونص
يا ابن المفكوكه

الزوجة : (تقف بينه وبين يوسف) يا راجل قول سلامو عليكوا .. إنت بتشتم
ريحة الفلوس تطلع كدة زى القضا المستعجل

الزوج : سلامو عليكوا يا مربية الأجيال .. (يلتفت للولد) جنيه ونص؟! دا أنا
لما كنت بُرص قذك كدة.. كنت بعمل 25 جنيه .. أيام ما كان الجنيه بيحسب
كيس دوريتس .. أودى وشي فين من شحاتين السيدة؟! .. أقابل نشالين المنطقة
بأنهى وش .. أخلق دقني وألبس نضيف ويقولوا عليا بقيت محترم
الزوجة : لأ ياخويا كله إلا كدة

الزوج : ما دى أخرتها يا ولية .. أخرتها هنبقى محترمين ونستلف من اللى
يسوى واللى مايسواش .. ومش بعيد كمان أتوظف ومالقيش أكل آخر الشهر ..
آآآآآ .. فينك يابا .. فينك يا حاج كماشة يا كبير تشوف حفيدك بيعمل فيا إيه ..
(يبكى بكاء مصتنع)

يوسف : خلاص بقى يابا .. إنت هتعملهم عليا

الزوج : سكتى الواد ده يا ولية .. سكتيه .. (يمسكها من الجلابية) شوفتى آخر
تربيتك للواد؟! .. بقى اسبيهولك تسرحى بيه على باب الجوامع وفى الآخر يُبق
فى وش أبوه

الزوجة : ياخويا لسه صغير .. بكرة لما يكبر نعلّمه النشل ويبقى حرامى قد
الدنيا .. وربنا يباركلنا فيه

يوسف: أنا مش عايز أبقى حرامى زى أبويا

الزوج: إيه؟! إيه؟! (يمسك قلبه فى حالة إعياء مصتنع) كمان?
(يجلس على المقبرة)

الزوجة : (تذهب له الزوجة تحرك الهواء بيدها أمام وجهه) خلاص ياخويا ..
أعصابك

الزوج: مش عايز تبقى حرامى .. (فى عصبية) هى حصلت؟!!

الزوجة : والنبي ماتعصبش روحك كدهون

الزوج : إنتى مش سامعة بيقول إيه ؟ .. بيقولك مش عايز أبقي حرامى .. الواد بيضيع منى .. الواد بيضيع منى قدام عينى .. فينك يابا .. فينك يا حاج كماشة يا كبير .. إنتى السبب يا ولية .. إنتى اللى ضيعتى الواد .. إنتى اللى ضيعتى مستقبله .. قعدت أقولك نقطع صباعه والّا نقطعله رجل ونسترزق بيه .. قلتى لأ .. قلتاك نبيع كلية والّا عين .. قلتى لأ .. أنا بقى هقطعلك لسانه من سقف زوره الجوانى .. من اللوز (يقوم ويمسك يوسف من قفاه)

يوسف : والله إنت بُق ولا تعرف تعمل حاجة

الزوج : آاه .. يا قلبي .. (يبكى) ليه كدة يا زمن .. ليه يا دنيا الواحد بيقرب والناس بيعاه .. ليه يا دنيا تعملى فيا كدة .. أنا زمان كنت عايش سلطان زمانى .. دلوقت أنا عايش ومش عايش .. أنا مش عارفنى أنا تهت منى .. أنا مش أنا الزوجة : والنبنى ياخويا خلاص ماتقطعش قلبي .. شوف (تخرج من صدرها كيس فلوس) .. دا أنا عاملة النهاردة 140 جنيه

الزوج : (بفرح) 140 جنيه ؟ .. (يغنى آاه لو لعبت يا زهر)

الزوجة : أيوه كدة رَوّق ياخويا

يوسف : رَوّق يا ابن المحظوظة

الزوج : (يغيط إبنه) .. بس ياض يا ابو جنيه ونص .. مش عايز تطلع حرامى ؟ .. أmaal عايز تطلع إيه ياض ؟

يوسف : عايز أطلع شحات

الزوج : (يقف بحسم) .. ما عندناش عيال يطلعوا شحاتين .. الشحاتة دى للنسوان وبس .. وطالما مش ناقصك إيد أو رجل أو عين .. يبقى غصب عنك لازم تبقى حرامى .. أنا أبوك وعارف مصلحتك .. صحيح الناس مبقاش معاها فلوس .. والمحظوظة من دول تلاقيها مليانة ورق مالوش لازمة على روستات على تحاليل .. لكن أنا بعلمك مبادئ الحياة .. ومش بعيد تطلع حرامى كبير .. وتسرق فلوس الناس الغلبة وتسفرهم سويسرا .. وساعتها ماحدش هيقدر يقف ف وشك أو يحاسبك .. وهيدوك تعظيم سلام .. إنما تسرق 20 جنيه والّا 50 جنينة عشان تاكل هتدخل السجن وهتتنفخ ضرب (يضع يده على قفاه) .. غير بصة الناس ليك .. (يذهب ليوسف ويضع يده على كتفيه) .. من بكرة هعلمك

السرقه عشان تبقى نضيف فى البلد دى .. ومش بعيد على ربنا تبقى مسئول
كبير فى يوم من الأيام

الزوجة : واحنا ياخويا مش ممكن نقب على وش الدنيا .. ونشوف لنا تربة
نسكن فيها لوحدنا

الزوج : مش للدرجادى يا ولية .. إحلمى على قدك .. إحنا نسكن مشترك فى أى
تربة جديدة .. أنا يا بت باصص لفوق .. لفوق أوى .. هسكنك فى أحلى تربة فى
6 أكتوبر .. هناك القرص بتيجى من لابوار والعبد .. وبيقولوا عليها باتيه ..
وهنستريح من الجوافه المعفنه والبلح المدود

الزوجة : يا رب ياخويا .. يسمع منك ربنا

الزوج : (يلتفت حوله) .. يالا بقى نمشى من هنا قبل ما غفير الترب يقفشنا ..
هنا نتحاسب وناكل لقمة خلاص .. الترب دى مافيهاش بيات .. حاكم بيقولك
العفارييت هنا .. بيتكلموا ويتخانقوا زى اللى عايشين بالظبط
(تمسك الزوجة به خائفة _ ويجرى يوسف ليمسك فى جلابية أمه)

الزوجة : يالا ياخويا .. يالا

(يخرجون)

اللوحة السادسة

(تدخل كالوشة إلى المسرح _ فتاة فى العشرينات تقريبا _ شكلها سئ جدا ..
ترتدى ملابس حمراء وببيدها وردة تلاحظ خروج الزوجة والزوج ويوسف)

كالوشة : إيه الناس دى ؟ الترب لمت ولا إيه ؟ هو مافيش راجل يدخل
لوحده أستفرد بيه .. جايلى واحدة وإبنها .. مسير الدنيا تلعب وأزرق واحد
هنا لوحده وأتجوزه .. إשמعنى أصحابى يتجوزوا وأنا لأ .. مع إنى أجمل
منهم .. (ترفع يدها للسما) .. أنا نفسي فى عريس بقى يارب ..
(تنادى) يا أم كالوشة .. يا أم كالوشة

أم كالوشة : (من داخل الكواليس) عايزة إيه يابت يا كلوشة ؟

كالوشة : أنا تعبت نفسي يا أمه .. تعالى إلحقيني

أم كالوشة : (تدخل إلى المسرح .. امرأة كبيرة شعرها منكوش وشكلها سيء جدا) (ترتدي جلباب بلدي)

أم كالوشة : إيه يابت طمنيني لقيتي عريس ؟

كالوشة : مالمقتش يا أم كالوشة بوشك ده

ام كالوشة : جتك نيلة يا موكوسة .. على العموم هيا العرسان على طول
بتهرب ، ماتحسبش إن الموضوع سهل .. أصل اليومين دول مافيش
عرسان بتيجي تقولك أنا عايزه أتجوزك .. (تجلس على المقبرة).. ده
لازم يكون ليها خطط وتخطيط .. وتقعدى توقعي العريس على الهادى

خاااااالص

كالوشة : إيه يا أمه أوقعه دى .. هو أنا مش لازم أحبه الأول ولا أنا مش مكتوبلى أحب

أم كالوشة : تحبى إيه يا بت .. اللي زينّا ما ينفعش يتحبوا .. الحب ده في أفلام السيما بس .. عند الست منى ذكى والست ياسمين عبدالعزيز .. (تمسك وجه كالوشة) .. أنا راضيه ذمتك .. (تشير لها) ده منظر منى ذكى ؟

كالوشة : (تشير لأمها) وهو ده يعني اللي منظر ياسمين عبدالعزيز ؟
أم كالوشة : (تضحك وتظهر أسنانها المسوسة) .. بقولك إيه يابت .. إنتى لازم تعملى حاجة من الإثنين .. يا إمّا توقّعى العريس خبط لرق .. ونزقه ونجوز هولاك عافية .. يا إمّا نرسم له خطة سوا
كالوشة : لا .. نرسم له خطة يا أماااه

أم كالوشة : (تجلس وتخرج من صدرها خريطة كبيرة ومنقلة ومسطرة حرف T)

كالوشة : إيه ده يا أمه .. أنا ماليش فى الحاجات دى .. أنا عايزاكى تفهمينى بالبلدى كدة .. وبراحة
أم كالوشة : مااااشى .. (تضع الأدوات والخريطة خلف المقبرة) .. بصي .. أول حاجة لما تشوفى الراجل اللي حَكَم عليه القدر يكون من نصيبك .. تعملى إيه ؟

كالوشة : أشيلّه فى وشه .. وأعكشه من رقبتّه وأزقّر إيدى بكشافين على وشه .. وأكله نص .. وأروح نازلة عليه بالبوانى فى ...

أم كالوشة : (تقاطعها) .. بس بس بس .. الله يخرب بيتك .. إحنا قولنا هنرسم خطة عشان عريس مش هنفقش حرامى .. أول حاجة تقومى مسبلّله

كالوشة : أسبلّه بالأب ولا بالأم يا أمه

أم كالوشة : الله يوكسك يا موكوسة .. تسبّليّه .. مش تسبّليّه .. يعنى كدهو

عفاريث نص سوى هانى مهران

(تقوم أم كالوشة بالتسبيل للجمهور بطريقة أوفر)

كالوشة : إيه يا أمه ده .. لا مش هعرف

أم كالوشة : طب إعملى حاجة تانية أسهل

كالوشة : إيه ؟

أم كالوشة : إغريه .. ساكسى بوكس

كالوشة : لا دى حتى بقي (تشمر يدها .. وتظبط ياقة البلوزة)

أم كالوشة : وريني حتة كده طيب وإنتى بتغريه

كالوشة : (كالوشة تشمر البنطلون نجد كالسون وتمشى بطريقة عجيبة من

يمين المسرح ليساره)

أم كالوشة : هو إنتى كده بتغريه !؟

كالوشة : يعني أعمل إيه يا أمه ما أهو .. (تمشى مرة أخرى)

أم كالوشة : بس يا بت .. يابت الإغراء مش كدة .. الإغراء له مدرسة

(تقف وتجذب إبنتها لتجس وتشاهد بينما تقف هى على أول المسرح)

أم كالوشة : شوفي بقي الإغراء وإتعلمى

(تمشى هى بطريقة أوفر وتقفز أثناء الحركة)

كالوشة : العلم نورن فعلا .. الموضوع ماطلعش سهل .. أنا هقعد أتدرب

عليه لغاية ما أظبط الدنيا

أم كالوشة : طب يالآ بقى يا بت نروح ع الفرشة بتاعة الشاى .. ونستنى

لحد ما عريس يقع ونقوم مستلقطينه على طول

كالوشة : مش قبل ما تقوليلي وقعتى أبويا إزاي ؟

أم كالوشة : ياااااااااه .. فكرتيني بأيام الشقاوة والحلاوة واللياقة البدنية ..

أقولك يابت .. أنا كنت زمان أصحى الصبح بدرى .. أقول يارب يا كريم

إبعت العريس من عندك يارب .. وأروح على موقف الأتوبيس .. إني
ألاقي حد يبصلى يابت .. والنبي ياختي ما كنت بلاقي حد يعبرني

كالوشة : مع إنك أحلى من منى ذكى

أم كالوشة : تقولى إيه بقى للناس اللي مش بتحب الوش المسمم .. المهم
.. أروح بعدها على أيتها سيما .. أدور على عريس مالقيش برضه ..
روحى عاملة فكرة جهنمية .. رحت عند كوبرى 6 أكتوبر .. ووقفت على
آخر نزلة فى الكوبرى .. ورحت مستخبية ورا شجرة

كالوشة : كنتى هتنتحرى ولا إيه يا أمه ؟

أم كالوشة : يابت بستلقت عريس يخرب بيتك .. وعلى الكوبرى سمعت
صوته .. جاي من فوق الكوبرى

كالوشة : صوت أبويا ؟

أم كالوشة : لأ .. التروسيكل اللي راكبه أبوكى .. وهو يقرب وأنا قلبي
يرفرف .. هو يقرب وأنا قلبي يرفرف .. واول ما شفته نازل النزلة ..
رُحت طالعاه فجأة .. إتخض .. راح لابس فى العمود على طول ..

(كالوشة نجدها متأثرة بالحكاية وكأنها طفة يحكى لها حدوتة)

أم كالوشة : أسيبه ؟ طبعا لأ .. رُحت لافحاه على كتفي وجريت بيه

كالوشة : وطبعا ودتيه المستشفى

أم كالوشة : مشتشفي إيه يا موكوسة .. رُحت ع المأذون على طول .. هو
أنا هاستناه يفوق ومايكتبش عليا .. على طول دبسته ف الجوازة عدل

كالوشة : يعنى أنا أسيب الترب هنا وأنزل على الكبارى ؟

أم كالوشة : إحنا دلوقت نروح الفرشة عشان سايباها لوحدها .. ونخلينا
متابعين الدنيا هنا .. وبكره ولا بعده تنزلى الدائرى ولا كوبرى مايو ..
وربنا يكرمنا

كالوشة : يارب .. يالا بينا

(يخرجان)

إِظلام

اللوحة السابعة

(يتم إضاءة بؤرة على المقبرة فى الوسط وقد تم فرشها بقماش أنثريه _ يظهر فى السلويت فى منتصف السور صورة وفازة وكوميدينو وأباجورة .. يوحى المشهد بغرفة نوم _ بينما تكون الإضاءة خافتة فى باقى المسرح _

(نظام البؤرة المتعارف عليه مسرحيا)
(تجلس رحمة فى حالة حزن _ ترتدى ملابس منزلية _ غير محجبة)

ندى : (تدخل لمنطقة الإضاءة _ الغرفة _ فتاة فى العشرين من عمرها _ ترتدى ملابس خروج واسعة ومحجبة)

ندى : مساء الخير .. عاملة إيه دلوقت .. برده مالبستيش .. ما أكيد مش هتعدى كدة على طول .. دا تانى يوم بجيلك فيه ومش بتراضى تنزلى معايا .. شكلك كدة مش عايزة نبقى أصحاب .. طب أنا ماشية

(تتحرك ندى للعودة فتمسك رحمة بيدها .. فتعود لتجلس بجوارها)

ندى : مالك بس ؟

رحمة : مخنوقة

ندى : مخنوقة من إيه ؟

رحمة : يعنى مش عارفة ؟ من المعاكسات والمضايقات طبعاً .. مافيش مرة الواحدة تنزل تخرج من غير ما حد يقل أدبه عليها .. دى مش حاجة تخنق

ندى : طب ما كلنا بنتعاكس وبنخرج .. وأنا جايلك إتعاكست أكثر ما إتنفست .. دول بقوا عاملين زى حديقة الحيوان .. تتفرجى عليهم ببلاش من غير ما تدى الحارس فلوس (تضحك)

رحمة : إنتى بتضحكى ؟ أنا مابيطيش أسمع الكلام اللى بيقولوه

ندى : إعتبريه مجاملة

رحمة : المجاملات دى كانت زمان .. دلوقت بقى الكلام كله قلة أدب .. يا إما تلاقى واحد بيقولك : ماتيجى ونجيب مليجى
ندى : مليجى ؟

رحمة : أو يقولك مش هنروح ونجيب ممدوح .. أو تعالى ونجيب سالى
ندى : وهما لازم يجيبوا عيال فى المعاكسة

رحمة : يعنى إنتى مش بتسمعى الكلام ده ؟
ندى : بسمع وبفوت .. مرة وقفت تاكسى ولسة هركب ورا .. قالى ماتيجى قدام
ونجيب همام

رحمة : وعملتى ايه ؟
ندى : نزلت طبعا وهزقته .. ركبت تاكسى تانى

رحمة : وسواق التاكسى التانى ماضبطش المرايات على عنيكى وجسمك وقالك
عنيكى حلوين أوى يا آنسة .. لينسىز ولا طبيعى ؟
ندى : لأ .. كان محترم .. وأنا نازلة قالى : ياريتنى كنت الكنبه اللى ورا
رحمة : وده كدة محترم ؟
ندى : على الأقل ماجبش سيرة ممدوح ومليجى

رحمة : مابلاش ننزل النهاردة ونقعد على الفيس أحسن .. أنا فتحت الأكونت تانى
ندى : آه صح .. أنا كنت فاكراكى عملتلى بلوك كنت هموتك .. وقفلتيه ليه بقى دا
كمان برده المعاكسة ؟

رحمة : طبعا .. واحد يدخل يقولك : ماتيجى ندردش ونجيب مشمش
ندى : هما برده بيحبوا عيال على الفيس ؟

رحمة : من كتر العيال اللى جنبناها فى المعاكسة حاسة إن كل بنت فينا فاتحة ملجأ
.. وماحدث بيخرج عشان مش عارف يسيب العيال مع مين ههههههه

ندى : ما إنتى منزلة صورتك وعاملالى بوز البطة .. أكيد هيفتكروك مش كويسة
..دى عالم دماغها تعبانة .. إبقى إعمليلهم بلوك

رحمة : على فكرة مالهاش علاقة بالصور .. عارفة ليلي صاحبتنا .. شالت كل
الصور من على الفيس .. وجابت صورة بروفایل بنت صغيرة بتدعى بتقول يارب

.. وصورة غلاف مكتوب عليها : ولسوف يعطيك ربك فترضى .. وغيرت إسمها
وكتب : المشتاق للجنة

ندى : ماتقوليش بقى إن حد عاكسها
رحمة : لا أبدا .. واحد بعثها رسالة بيقولها : أنا عايز أتوب ونجيب أيوب
ندى : برده ؟
رحمة : برده

ندى : طب سيبك بقى .. تعالى نتصور سيلفى وننزلها .. ونعمل مينشين للبت ليلي
عشان نغيظها .. هاتى حضن مميمم (تخرج الموبايل ويتصوران)
رحمة : يالا .. نزليها بقى

ندى : هو أنا لو نزلتها ماحدش هياقل أدبه ويقول علينا بنات شمال ؟
رحمة : هو إنتى كمان خايفة إن يتقال عليكى كدة .. وعازة ننزل نخرج
ندى : هو لو خرجنا لوحدنا هيقولوا علينا شمال
رحمة : (تهز رحمة رأسها.. بنعم)
ندى : أكيد لأ .. بيتهيألى على حسب المكان اللى هنمشى فيه أو نروحه
رحمة : طيب هنروح فين ؟

ندى : نقعد على كافيه نرغى شوية
رحمة : هيقولوا علينا شمال

ندى : طب نتمشى فى وسط البلد ونجيب أيس كريم
رحمة : هيقولوا علينا شمال

ندى : نقعد على الكورنيش

رحمة : هيقولوا علينا شمال

ندى : بس .. إحنا ندخل سينما

رحمة : (تعمل شفايفها يمين وشمال وتلطم)

ندى : طب بلاش نخرج النهاردة .. إحنا بكرة الصبح نلبس ترينجات ونجرى ..
شوية رياضة بقى .. ها قولتى إيه ؟
رحمة : نجرى فى الشارع بترينجات ؟

ندى : رياضة .. كل الناس برة بتعمل كدة .. وكمان عندنا هنا بنشوف ناس كتير بتجرى الصبح ولا بسين لبس رياضة وشورتات كمان

رحمة : دول شباب .. مش بنات .. فيه فرق كبير

ندى : وتفتكرى هيقولوا برده علينا شمال لأننا بنلعب رياضة

رحمة : لا هما مش هيقولوا .. هما هيمارسوا معانا رياضة .. هتلاقى نص مصر بتجرى ورانا ويتفرجوا على جسمنا وإحنا بنجرى
ندى : نص مصر ؟!

رحمة : والنص التانى هتلاقيه واقف عند خط النهاية وعاييز ياخذك بالحضن عشان كسبتى

ندى : كسبت إيه وخط نهاية إيه بس ؟

رحمة : دا هيعملوك خط نهاية مخصوص .. ويصوروا .. ويجيبولك كاس كمان عشان يحتفلوا ويعملوا زحمة وظيطة .. وإنتى عارفة بقى إيه اللي ممكن يحصل فى الزحمة

ندى : ما تكبريش الموضوع .. إحنا هنجرى شوية ونرجع

رحمة : أوعذك إن إحنا هنجرى .. بس موضوع الرجوع دا ما أضمنهوش
ندى : طب والحل .. إحنا هنفضل كدة ولا إيه ؟ .. لا .. أنا عايزة أخرج وأتبسط ..
تعرفى أنا نفسى فى إيه ؟

رحمة : إيه ؟

ندى : (تقف) .. نفسى ألبس فستان وأعمل شعري بتسريحة جديدة وأتمشى على الكورنيش

رحمة : (تضرب يدها على صدرها) يالهوى .. إنتى اتجننتى ؟ فستان وتسريحة وتتمشى على الكورنيش .. التلات حاجات مرة واحدة يا مفترية .. إنتى بتحلمى

ندى : إنى ألبس فستان وأعمل شعري وأتمشى دا بقى حلم
رحمة : طبعا .. الكلام دا تعمله فى فرنسا فى ألمانيا .. أمريكا .. إنما هنا مستحيل

ندى : إنتى بتأفورى على فكرة .. ما أنا ياما شفت بنات لابسة فساتين فى الأفراح وعاملين شعرهم ومبسوطين ومأحش كلهم

رحمة : أديكى قلتى .. فى الأفراح .. فرح بيحصل كل سنة مرة ولا إثنين .. وبعدين إنتى فاكدة إنها بتتمشى فى الشارع كدة ولوحدها ؟ .. دى يا بنتى إخوانها وقرابيهها

بيحاولطوها أول ما تنزل من العربية قدام باب القاعة .. ولو ما عندهم مش عربية ..
بتركب تاكسى من قدام باب الشقة لغاية كوشة العروسة .. وبيكون معاها برده حد
من أصحابها

ندى : طب والحل ؟ هفضل كدة ما نخرجش ولا نروح فى حتة

رحمة : طب أقولك حاجة .. ليلى صاحبتنا بتنزل كل يوم

ندى : بتروح فين ؟

رحمة : مش عارفة .. بس بتقول إن ماحدش بيضايقها خالص وبتبقى على راحتها

ندى : خلاص نروح معاها .. كلميها

(تخرج ندى التليفون وتقوم بالاتصال بينما يتم إظلام تدريجى)

إظلام

اللوحة الثامنة

(تفتح الإضاءة على شهریار جالس على الأرض مستمتع بالحدوتة ويشرب شيشة .. بينما شهرزاد تضع له الفحم على الشيشة)

شهرزاد : ها .. إيه رأيك ؟

شهریار : (يسحب نفس من الشيشة) .. مش قادر أحكم بالضبط .. لكنى مستمتع ..
إنتى عارفة إنى بحب الحواديت ومستعد أعمل عشانها أى حاجة

شهرزاد: أى حاجة .. أى حاجة ؟

شهریار: طبعا

شهرزاد : (تقف) تعالى نرجع القصر

شهریار: (يترك الشيشة ويقف) .. لا .. أنا مش هرجع القصر إلا لما نخلص
الحدوتة

شهرزاد : طب إفرض الديك صاح والفجر طلع علينا هنا

شهریار: لا ماتقلقيش .. كل الديوك في القصر .. والفجر والصبح الجديد ما بيطلعش
غير على القصر بتاعى وقصور المسئولين .. والديوك مجرد منبه .. يقولنا
إستمعوا بحياة جديدة .. إعملوا اللي مالحقتوش تعملوه

شهرزاد: وهنا مافيش ولا فجر ولا صبح ؟

شهریار: لا .. هنا الفجر مابيطلعش .. الناس اللي عايشين هنا .. هيفضلوا كدة طول
عمرهم

شهرزاد: طول عمرهم يفضلوا فى الضلمة والليل والخوف

شهریار: لازم يا شهرزاد يفضلوا فى الخوف والليل .. عشان إحنا نتمتع بباقى الحياة .. الناس هنا لو شافوا فجر جديد ... هيطمعوا كل يوم يعيشوا حياة جديدة .. وده هيكون على حسابنا .. الصبح فى مدينتنا يادوب على قدنا وقد المسئولين اللى بيخدمونا .. لو حد شاركنا فيه .. مش هنعرف نعيش

شهرزاد : وإزاي يفضلوا عايشين كده طول عمرهم .. ماحدش هيحاول مرة يوصل للصبح ويشوف الحياة بشكل جديد؟

شهریار: ناس حاولت زمان .. لكن قدرنا نوقفهم عند حدهم ونرجعهم تانى

شهرزاد: بس الناس اللى عايشين هنا فى نص المدينة أكثر من نص المدينة اللى فيها قصور .. إزاي قدرتوا توقفهم وتمنعوهم

شهریار: قدرنا نمنعهم بمساعدة ناس من هنا .. ناس منهم

شهرزاد: ناس منهم؟! .. بقى فى ناس بترفض النور والصبح

شهریار: فى ناس لو خرجت بره العتمة تموت .. لو بطلت تتدل وتتهان يحصلها خلل فى حياتها .. التعود أكبر من الحلم بحياة جديدة .. إنتى نفسك مش مستحيلة تقعدى هنا وقت أكبر .. وحشك القصر

شهرزاد : بس الناس هنا صعبوا عليا

شهریار: لو صعبوا عليكى مش هيبقى فى فساتين ولا شنط ولا ماكياج .. وعلى رأى كلامهم : اللى يصعب عليك يفكر

شهرزاد: دا كلامهم ؟

شهریار: دا حياتهم .. عشان كدة قسمت الدنيا نصين .. مدينة النور والقصور .. ومدينة العتمة والقبور .. وكل واحد عاجبة حياته واتعود على مكانه

شهرزاد: طب إفرض حد فيهم قدر يوصل لمدينة النور والقصور .. وعنده الإمكانيات اللى تخليه يعيش معانا

شهریار: ممنوع .. ابن الغفير لازم يفضل غفير .. وابن القاضى لازم يفضل فى مدينة النور والقصور حتى لو مش قاضى .. ممكن مسئول

شهرزاد: بس حكاياتهم اللى إتعلمتها بتقول عليهم غلبة ومساكين

شهریار: لأنها حكايات .. حكايات .. مش حقيقة .. عشان كدة بحب أسمع الحواديت
اللى عارف إنها من خيالك

شهرزاد: وبعد الحدوتة نرجع مدينة النور والقصور

شهریار: هنرجع يا شهرزاد أكيد .. (يعود للشيشة) كملی .. كملی الحدوتة

شهرزاد : بلغنى أيها الملك السعيد .. حاكم مدينة النور والقصور

(موسيقى نهاية المشهد مع إظلام تدريجى)

إظلام

اللوحة التاسعة

(يتم إضاءة السلويت فى الخلفية على صورة حاكم بدون وجه يرتدى تاج _ يتم استخدام المقبرة كمكتب تحقيق _ (بؤرة) _ نجد حسن المتهم يجلس على كرسى أمام المكتب بينما يقف المحقق يشعل سيجارة ويطفئها فى طفاية صغيرة على المكتب)

(المحقق فى الخمسين من عمره ، يرتدى بدلة وجراب مسدس _ بينما حسن شاب فى العشرينات يرتدى بدلة مساجين)

المحقق : مبسوط إنى شفتك يا حسن .. بسمع عنك أخبار حلوة من آخر مرة كنا سوا .. أنا عارف إنك زعلان منى .. بس دا شغل والشغل مايزعلش (يذهب المحقق لحسن ويتفقد وجهه بيده)

المحقق : ورينى كده .. لا تمام عنيك خفت ورجعت أحلى من الأول .. أنا عارف إن إيدى ثقيلة .. بس إنت اللى كنت منشف دماغك .. المرة دى أنا متأكد إنك هتكون متعاون أكثر .. الدنيا إتغيرت كتير .. والأوضاع إختلفت أكثر .. ولا بقى فيه ثورة ولا مظاهرات ولا حد بيسأل عنك .. (يجلس على المكتب) .. بس أنا مش جاي أشمت فيك ولا حاجة .. بالعكس .. أنا جاييلك معايا خبر حلو .. إنت من الناس اللى " ممكن " يصدر عشانها عفو رئاسى .. والدردشة دى من غير ورق ولا تسجيل ولا أى حاجة .. إعتبرنى صديق .. تعرف إنك شبه أخويا الصغير .. أنا هعتبرك أخويا .. وعائزك تظمن ع الآخر .. دردشة بين إثنين إخوات مش أكثر .. قلت إيه؟ المتهم: (يقف يسرح فى الكلام ويفكر)

المحقق : مالك؟

المتهم: أبدا .. بفكر فى الكلام .. مش متعود عليه

المحقق: من هنا ورايح بقى الوضع هيفتخلف .. إنت راجل بكرة هتبقى "على الأسفلت" مش إنتوا بتقولوا كدة "على الأسفلت"

المتهم : بس أنا محكوم عليا بسبع سنين

المحقق: بقولك عفو رئاسى .. إيه مش عايز؟

المتهم: ودا بمناسبة إيه ؟

المحقق: (تتغير لهجته ويعلو صوته) .. هو أكل وبحلقة ؟

المتهم: إنت مش قلت دردشة بين إخوات .. أنا عايز أعرف

المحقق: (بهدوء) .. تقدر تقول كدة .. مابقاش ليكم لازمة .. (يضحك)

(حسن يغضب ويمشى من مكانه ويعود للكرسى)

المحقق : إيه الصراحة زعلتك ؟

المتهم : (لا يهتم بالسؤال) أنا بس اللي هخرج ؟

المحقق: لا .. شوية كمان .. الناس اللي واثقين إنهم عقّلوا ومش هيفكروا يعملوا حاجة

المتهم : (بتحدى) معنى كلامك إنكم لسة خايفين ..

المحقق: (بغضب) لا يا حبيبى مش خايفين .. بس تقدر تقول كدة بنحسكم بعجزكم

المتهم: عمركم ما هتتغيروا

المحقق : مصلحة البلد .. أهم مش شوية عيال طايشة مش فاهمة حاجة

المتهم: (يقف ويواجهه) بلد مين ؟ بلدكم والا بلدنا ؟

المحقق: البلد اللي خيرها عليك وعلى أمثالك ... اللي عملتك بنى آدم

المتهم: أنا عمرى ما حسيت إنى بنى آدم إلا بالثورة اللى بتحاولوا تموتوها ..
وبعدين خير إيه اللى بتتكلم عنه .. اللى ماحدش حاسس بيه غيركم وغير المسؤولين
الكبار .. الناس بتاكل من الزبالة .. تقدر تقولى الغلبة اللى مش لاقية علاج .. فين
خير البلد عليهم ؟

المحقق: (يمسكه من رقبته) إنت هتعمل ثورة تانى ولا إيه ؟

المتهم : (يُنزل يد المحقق من عليه بهدوء) يا باشا إحنا جينا نعمل ثورة .. إتعمل
بيننا ثورة .. إحنا مش حمل إننا نودع أصحاب تانى من غير ماييجى حقهم

المحقق: برافو .. برافو .. هو ده .. أحب الناس العاقلين .. الناس مابقتش حمل
مظاهرات واشتباكات وناس تموت وناس تتصاب وناس محدش يعرف هى فين ..
وبعدين كل ده لمصلحة مين ؟ .. الناس عايشة ومبسوطة

المتهم : مبسوطة ؟!

المحقق: طبعاً .. آاه ما إنت ماشفتش .. أحب أطمئك إن الناس رجعت أحسن من
الأول .. بتسهر وتضحك وترقص وتسمع أغانى .. وببشتغلوا أكثر من الأول .. بقى
فى أمن والناس فرحانة

المتهم : الناس عمرها ما كانت فرحانة .. الناس خايفة .. إنتو اللى وصلتوهم لكدة ..
إنهم يرضوا بأقل حاجة ويفضلوا طول عمرهم فى دوامة أكل العيش والخوف على
ولادهم وحياتهم

المحقق : الناس اللى بتتكلم عنهم دول هما اللى جابوك هنا .. هما اللى لو فكرت إنك
تطالب بحقهم فى حاجة هيمنعوك .. ومش بعيد يضربوك

المتهم: لأن الآية مقلوبة .. مابقاش شايفين طريق يمشوا فيه .. مابقاش شايفين
لحاجة نهاية حلوة .. ولا حتى بداية .. أنا حتى مبقتش عارف إمتى ممكن الدنيا تحن
على الغلبة (صمت) .. حضرتك عايز منى إيه؟

المحقق: أنا مش عايز منك حاجة .. أنا عايزك تعرف إن ماحدش هينفعك ..
وماحدش هيقف جنبك

المتهم : والحلم

المحقق : حلم إيه؟

المتهم : العيش والحرية والعدالة الإجتماعية .. إننا نعيش بنى آدمين .. إن يبقى لنا وجود .. إننا نتنفس هوا نضيف من غير رشوة ولا واسطة .. إننا نحاكم الفاسدين .. نمحى الظلم .. نحب .. نعيش حياة محترمة .. نأخذ حقوقنا .. يبقى لنا قيمة .. نتعامل باحترام وبدون إهانة .. هو ده كثير؟ .. كثير إننا نعيش بنى آدمين .. والله حرام .. حرام

المحقق: بس كده ؟ كل ده نحققهولك ..

المتهم: إنتوا اللي هتحققوه ؟!

المحقق: أمان مين .. إنت ؟ الناس ؟ .. ما تقلقش .. إحنا دايما اللي بنحقق كل حاجة .. وأول حاجة الحرية .. إعتبر نفسك حر من دلوقت

المتهم: حر ؟!

(يذهب المحقق إلى المكتب ويمسك بالقلم ويفتح أحد الملفات)

المحقق : أنا هضيف إسمك فى العفو الرئاسى

(بعد أن يكتب .. يأخذ ورقة ويقف مواجهها لحسن ويمد يده بالورقة)

المحقق : شفت إننا نقدر نحقق كل حاجة ؟

المتهم : (يمسك الورقة وينظر لها ثم ينظر للمحقق) .. طب ممكن طلب أخير

المحقق : إتفضل

المتهم : رجعوا إخواننا اللي ماتوا

(إظلام سريع)

اللوحة العاشرة

(تفتح الإضاءة على التربي وهو يخرج من السلم الداخلى للمقبرة التى دخل فيها فى ظوره الأول _ يعرج وملابسه مقطعة يتسحب _ صوت موسيقى عالى _ يظهر خيال ضل كبير فى السلويت الخلفى بشكل عفريت)

العفريت : (الصوت له صدى) مساء الخير يا برنس

(ينظر للخلف فيجد الخيال _ يجرى ويختبأ بجوار أحد المقابر)
التربي : يا نهار أبيض ! إيه ده ؟ إنت مين؟

العفريت : بتاع الميلا مين (يضحك) .. هكون مين يعنى ؟ عفريت يا عم .. إنت مش شايفنى خيال فى الحيطه

التربي : وعاييز منى إيه ؟

العفريت : ولا أى حاجة .. أنا بقالى كتير مطلعتش لحد .. قلت اطلعك نهري فى أى حاجة وخلص

التربي : نهري ! لا يا عم مش عايز اتكلم مع حد فيكم .. كفاية اللى حصل منكم تحت فى المقبرة الضلمة (يظهر عليه الأسى والحزن)

عفريت: خلاص بقى قلبك أبيض .. علقه تفوت ولا حد يموت

التربي : بقولك إيه .. إتكلم من هنا .. شوفك أى شغلانة بعيد عن نافوخي

عفريت: بتطردنى من الترب ؟ هى كانت ترب أهلك !

التربي : إنت هتغلط ياوض؟

عفريت: الحق عليا إني جاي أخدمك

التربى : تخدمنى ؟! لا يا عم كفاية اللي شفته منكم

عفريت: أمشى يعنى ؟!

التربى : لا إستنى .. (يخرج من خلف المقبرة) .. طالما خدمة .. قول .. بس ياريت تطلع حاجة عليها القيمة

العفريت : بص يا سيدى .. في شوية عيال ببيجوا هنا عشان يحششوا فى الترب .. وفيه حرامية جايين يسرقوا جثث من هنا

التربى : (بإستغراب) إنت جبت الكلام ده منين ؟!

العفريت: هو إيه اللي جفته منين يا عم .. أنا عفريت .. أحلفك على مصحف عشان تصدق

التربى : آآآآه .. طيب وحية أوى لأولع فيهم

العفريت: لأ .. تولع فيهم لأ .. مش ناقصة زحمة هنا .. يطلعهم عفريت ويزاحمونا فى أكل عيشنا .. كفاية بطالة بقى

التربى : إنتوا كمان عندكم زحمة وبطالة ؟

العفريت: طبعا .. المهم إنت تبلغ عليهم البوليس أحسن

التربى : خلاص .. تمام .. أول ما هقفشهم هبلغ البوليس على طول .. ولا أقولك .. خدمة بخدمة بقى .. إنت أول ما تشوفهم كلمنى

العفريت : طب هات رقمك .. أكلمك على الواتس أب

التربى : واتس أب ؟! لأ مش عندى واتس .. كلمنى على الفيس بقى

العفريت : (ييكى)

التربى : مالك فيه إيه ؟!

العفريت: الأكونت بتاعى اتسرق .. الدنيا مبقاش فيها أمان

التربى : خلاص ياعم .. إبعثلى بليز كول مى

العفريت : تمام .. هات بقى عشرين جنية عربون ؟

التربی : عشرين جنيه ؟

العفريت : آآه .. هو أنا جاى أنفَعك من غير فلوس .. توتو على كبوتو

التربی : توتو على كبوتو ؟! إنت منين ؟

العفريت : من إمبابة

التربی : طب بقولك إيه .. قَدّر تتقدر.. أنا مش دافع حاجة وإمشى من هنا بدل ما أشغل قرآن

العفريت : ماتزوقش بس .. أنا رايح ألعب جيم بلايستيشن وراجع (يختفى)

التربی : روح .. يارب تخسر .. الله يخرّب بيت العفاريت .. منكم لله .. ضيعوا الحجرين من نافوخي

(يخرج)

اللوحة الحادية عشر

(يدخل عسكرى متنكر فى شخصية رجل صعيدى بينما يضع البندقية على كتفه والحزام على الجلابية _ ويمسك جهاز لاسلكى _ معه جردل)

العسكرى : (يرش مياه بيده كعادة الالعاملين فى المحلات ليبارك لهم الله)

العسكرى : (بصوت عالى) أدخل برجلك اليمين يا سعادة البيه .. ربنا يجعلها فتحة خير علينا

(يدخل الضابط يرتدى جلابية صعيدى بينما يضع حزام المسدس ظاهرا ويتفقد المكان)

العسكرى : (يضع الجردل جانبا) .. ربنا يحرسك من العين يا بيه .. وإن شاء الله تبقى مطبوعة ومحبوكة

الضابط : هى إيه اللى محبوكة ؟

العسكرى: القضية يا سعادة البيه

الضابط : آه .. قولى .. إنت متأكده إن دا المكان ؟

العسكرى : طبعا يا بيه .. اللى إتصل قال إن الترب جنب ماكدونالدز بالظبط

الضابط : مفيش ترب تانى فى المنطقة ؟

العسكرى : لا يا بيه ماتقلقش .. دا أنا لاففها كويس أوى

الضابط : هى إيه دى اللى لاففها ؟

العسكري : المنطقة يا بيه

الضابط : تمام .. تمام .. أهم حاجة فى شغلنا الانضباط .. مش عايزين ننسى حاجة .. الحشاشين يتمسكوا بالحشيش .. وحرامية الجثث يتمسكوا بالجثة .. مش عايزين قلق ومش عايزين أى غلطة .. أنا أقول : (بصوت عالى) سلم نفسك المكان كله محاصر .. وانت تحاصر .. وتلبس الكلابشات

العسكري : عيب عليك يا بيه دا أنا خبرة

الضابط : طب يا خبرة .. الراجل اللي اتصل مقالش الناس دى بتتردد على المكان إمتى ؟

العسكري : لأ يا بيه ماقالش

الضابط : أمال شافهم إزاي ؟

العسكري : ماشافهمش هو بيقول إن فى عفريت قاله عليهم

الضابط : عفريت ؟! .. إنت بتهرج ؟!

العسكري : هو اللي قالى كدة .. العفريت شافهم وبلغه

الضابط : ده تهريج .. ده إستهبال .. إزاي العفريت ما يتصلش مباشرة ويبلغنا

العسكري : يمكن تكون واقعة عندهم

الضابط : هى إيه دى اللي واقعة عندهم ؟

العسكري : الشبكة يا بيه

الضابط : آه .. طب إبقى ابعثله نحقق معاه ونعمله قضية تستر على الجريمة

العسكري : حاضر يا بيه

الضابط : (يجلس) قولى .. إحنا كده عاملين كام قضية ؟

العسكري : (يمسك آلة حاسبة يضرب عليها) .. بقضية النهارده يبقى 34

الضابط : وعمره بيه عامل كام قضية ؟

العسكري : 42

الضابط : وخيرى بيه؟

العسكرى : 58

الضابط : دا إستيهال .. إحنا كدا بنهرج

العسكرى: يا بيه دى كلها قضايا هايفة .. إحنا بتوع الكبيرة

الضابط: هى إيه دى اللى كبيرة ؟

العسكرى : القضايا يا بيه

الضابط : آاه .. إسمع .. القضايا دى لازم الكل يعرف بيها .. عايزين نغيظ خيرى وعمرى .. خصوصاً بقضية حرامية الجثث .. دى قضية جديدة وحلوة .. ومش منتشرة .. خد .. (يعطيه موبايل) .. صورنى عشان الفيس (يأخذ الموبايل ويصوره بأكثر من ريكاشن فى كل ركن بالمقابر) الضابط : إرفعها على الصفحة بتاعتنا

العسكرى : سهرانين عشان الوطن والّا حارسين الوطن ؟

الضابط : إنت إيه رأيك؟

العسكرى : حارسين الوطن أكيد .. عشان تكبر شويه

الضابط : هى إيه دى اللى تكبر شوية ؟

العسكرى : الصفحة .. ماعليهاش غير 17 واحد بس

الضابط : يابنى كانت عليها حوالى 32 ألف

العسكرى : دى أكونتات مضروبة يا بيه .. تبعنا

الضابط: آاه .. يسأل على الصور فى الموبايل (حمّلت ؟

العسكرى : أيوة يا بيه

الضابط : (يفكر فيما يكتبه على الصور) إكتب أأ .. إكتب أأأ .. (وكأنه وجد الكلام) .. نازلين .. حارسين .. شايفين .. فاهمين .. حاميين .. صامدين .. أى حاجة فيها إين

العسكرى : خانقين المجرمين

الضابط : الله عليك .. إكتب بقى يشعر بالفخر .. وحط الإيموشن اللى رافع حاجبه .. وإعمل هاشتاج إكتب فيه .. #جايين بالمجرمين واللى معطلنا البنزين

العسكرى : الله يا بيه يا أبو التفانين

الضابط : هو إنت فاكّر إن الضبوطية بالساهل .. كان أى حد بقى ظابط

العسكرى : يا بيه إنت اللى فيهم .. والله ما ليك عليا حلفان .. إنت معلم .. وإحنا منك نتعلم .. نقبض على المجرمين .. وكل الناس قاعدين .. ويتفرسوا يا غالى .. وإنت معلم

الضابط: شكرا يا إبنى .. شكرا (يتحفز للعمل _ وبصوت عالى) .. جاهز للشغل؟

العسكرى : جاهز .. هنعمل إيه بقى ؟

الضابط : هنستخبى فى المكان لغاية ما ييجوا .. وزى ما قلتلك .. أنا هقول : المكان كله محاصر .. وانت تحاصر .. وتحط الكلابشات فى أيديهم

العسكرى : طب هو الحشاشين اللى هيجوا الأول والآ حرامية الجثث؟

الضابط : الحشاشين أكيد .. لأن الحرامية لو جم قبل العيال ما تحشش هيتقفشوا .. لكن لو جم بعد ما العيال يحششوا مش هيفرق معاهم ولا هيعرفوهم

العسكرى : إيه الجمال والحلاوة دى .. والله متكلفة

الضابط: هى إيه دى اللى متكلفة

العسكرى: دماغك يا سعادة البيه

الضابط: آه .. إنت فاكرنى بلعب .. أنا بتجبنى كل التفاصيل قبل ما اتحرك من مكتبى .. تعرف أنا هيجبلى تسجيل صوت .. فيه الحوار اللى دار بين التربى والعفريت

العسكرى: الله أكبر

الضابط : أقولك كمان على مفاجأة

العسكرى: قول يا بيه يا حويط يا كبير يا متألق

الضابط : العفريت اللى طلع للتربى ده بيقى الواد على المخبر بتاع إمبابة

العسكري : ياه .. دا على كده كل حاجة متظبطة .. بس ليه يخلى التربى يبلغ ما كان هو قالك على طول

الضابط : يا غبى .. لما التربى يبلغ وما نعرفش نقبض عليهم ناخذ التربى بتهمة البلاغ الكاذب وتبقى قضية جديدة

العسكري : ياه .. سبحان الله .. صدق اللي قال .. يدى الحلق للى يدفع أكثر

الضابط : بلاش رغبى .. يلا .. عشان سامع صوت .. تعالى ..

(أثناء تحركهم تدخل أم كالوشة فجأة فتجدهم)

أم كالوشة : رايعين فين يا حلوتين ؟

الضابط : اللي أنا شايفه دا بجد ؟

العسكري : بجد ياباشا و ثرى دى مجسم (3D)

الضابط : تفتكر ممكن يكون رامز جلال ؟

العسكري : دا جحيم فى الهند الجزء الثانى ؟

الضابط : طب أنا هتصرف .. هتصرف .. (يحاول أن يتحدث صعيدي) .. إنت والّا إنتى مين ؟

أم كالوشة : بس ياااه .. (تجلس وتضع رجل على رجل) منين ياض إنت وهو ؟

(العسكري يقول للضابط الكلام لأن الضابط فى حالة خوف ولجلجة)

العسكري : ال سن بل وين

الضابط : السنبلالوين

أم كالوشة : بس اللي أنا أعرفه بقى يا حيلتها إن السنبلالوين مش صعايدة ؟

الضابط : (للعسكري) عاجبك كدة طلعا مش صعايدة .. مش عايز أسمع صوتك تانى .. أنا هتصرف .. (لأم كالوشة) .. قصدى إن إحنا من أسيوط

أم كالوشة : أسيوووووووط .. آااه .. طب إسمع بقى منك له .. لو مش عارفين أنا مين .. أنا أم كالوشة .. عارفين يعنى إيه أم كالوشة .. اللي ياما عملت صولات وجولات فى الترب .. يعنى ماتعديش عليها دبة النملة يعنى كان لازم قبل ما

الضابط : (برعب) أم كالوشة .. (للعسكري) هي أم كالوشة دى مهرجان حديد ؟

الضابط : نعم

الضابط : إيه هي اللي مكشوفة ؟

الظابط : ماحدث قالی .. دی أسرار عمل

الضابط : إيه ده باين عليا إني ضابط ؟

الضابط : (العسكري) وعمالة تقولى ماحدش هيعرفنا .. ماحدش هيفقشنا .. أهى عرفتنا .. (بغضب) وإزاي بتقوليلي يا ض وإنتى عارفة إنى ضابط

الضابط : (فى هدوء وخوف) إحنا آسفين يا أم كالوشة

الضابط : (للعسکری) إحق یالا بتعملی إزای .. لااااا .. مش ممکن .. إحق یالا بتعملی إزای ..

(تمسكه من يده وتسحبه ناحيتها .. بينما هو يحاول أن يتحدث إليها)

الضابط : أنا هفهم حضرتك .. أنا مش كدة خالص .. وبعدين بصى الواد ده أمور أكثر منى

(تمسك به أكثر .. وتجره بينما هو يقاوم ويمسك بالعسكري)

أم كالوشة : تعااااالى بقى .. (تخرج بيه)

(تنزل موسيقى ز غاريط وأفراح يرقص العسكري ويخرج خلفهم)

اللوحة الثانية عشر

(يدخل شلبى وشكشك على أنغام أغنية شعبى من الصب ومعهم mp3 صغير متصل بالصب _ يرقصون _ بينما محسن يلتفت فى كل الإتجاهات خوفا)
شكشك : مش قتللكم الأغاني بتفرق .. أهى دخلتنا عالم تانى .. أنا بتبسط لما بسمع أغاني

شلبى : المهم إن اليوم دا يبقى يوم عالمى .. وغير كدة يبقى عالمى
محسن : (يلتفت فى كل الإتجاهات) يا جماعة صدقونى فى هنا عفريت .. وطلع إتكلّم معايا

شكشك : (يفرش الملائة ويجلس) يا عم إحنا أول ما هنشرب السيجارتين مش هيفرق معانا عفريت من بنى آدم .. ولو هو إتكلّم معاك .. أنا بقى هخليه يشرب معايا

محسن : أنا قلقان وخايف وممكن أروح وأسبيكم .. أنا كدة مش هستمتع باليوم

شلبى : بقولك إيه بلاش تبوظ اليوم .. إحنا ما صدقنا نبعد عن الجو الكئيب بتاع العالم.. وغير كدة ما صدقنا نبعد عن الجو الكئيب بتاع العالم

شكشك : بلاش تجيبوا سيرة الكآبة .. عشان أنا لما بكتأب بجوع

محسن : طب أروح أجيبلكم أكل وتسيبوني أروح ..

شكشك : (يقف) لاا .. دخول الترب مش زى دخولها ..وبلاش اليوم يفكس مننا .. روح هات أكل وتعالى .. وربنا يهديك

محسن : تمام .. هاتوا فلوس

شكشك: إديله يا شلبى وأنا هبقى أحاسبك .. وروح معاه عشان ما يزوغش وهديه

شلبى : وهنسيبك هنا لوحديك

شكشك : ماتقلقش .. طول ما فى أغانى مافيش خوف .. ما تنسوش تجيبوا شيبسى

(يقوم يشغل أغنية يا حبيبى اللى يخاف من الغريب يطلعله)

(يخرج مديح ومعه كبايتين شاي ويرقص خلفه .. شكشك يلاحظه أثناء الرقص ف يطفى الأغنية)

مديح : ياه .. حلوة الأغنية دى ..

شكشك (لا يرد وينظر له بغضب)

مديح : (خائفا) كان فى حد هنا .. كنت جاييله شاي .. ما شفتوش ؟

شكشك : لا مش واخد بالى .. بس المكان هنا إحنا حاجزينه

مديح : يا سيدى ولا يهكم .. (يعطى له كباية شاي) .. إعتبر المكان كله بتاعك .. أنا بتبسط لما بلاقى حد أرغى معاه .. بتعدى عليا أيام ما بتكلمش مع حد خالص

شكشك : ومين سمعك .. الواحد بقى بيشوف أصحابه كل فين وفين .. الدنيا مشاغل ولازم نعذر بعض .. كل واحد بقى يقول يلا حالى .. أنا أصحابى دول ماجوش زارونى غير النهاردة .. وكمان عشان مصلحة

مديح : أنا بقى أصحابى بطلوا يزورونى .. بضطر آجى هنا وأعدى كل يوم يمكن ألاقى حد أتكلم معاه

شكشك: بس فكرة إنك تيجى هنا كل يوم مش تخوف شوية

مديح : وإيه يعنى اللي يخوف أكثر من الوحدة

شكشك : عندك حق .. بس ما بتقلقش من العفاريات .. دا صاحبي قال إنه طلعه

عفريت هنا .. وقعدنا نضحك عليه ضحك

مديح : طبعاً لازم تضحكوا .. عفاريات إيه بس .. أنا من ساعة أما مت ماشفتش أى

عفريت

شكشك : من ساعة إيه ؟!

مديح : من ساعة لما مت

شكشك : إتفضل الشاي .. الصباية .. محتاج فلوس ؟!

(شكشك يأخذ الملائة ويجرى)

مديح : إيه العيال الهبله دي .. دي عيال هايفة أوى .. أبقي أجيلهم وقت تانى يكونوا

إتجمعوا

(يخرج موبايل من جيبه ويتصل)

مديح : إيه يا أم كالوشة .. حضريلى برميل شاي بمية نار (يضحك ويخرج)

(يخرج)

اللوحة الثالثة عشر

(يدخل حرامية الجثث متنكرين فى ملابس غطس يتقدمهم الدكتور ممسكا بجهاز كشف مفرقات _ و mp3 أو جهاز التسجيل القديم _ يذهب فى إتجاه خروج مديح ويقف فجأة)

الدكتور : إستوب .. الجهاز لقط إشارات خضرا

مشرط : وده معناه إيه ؟

الدكتور : معناه إن الإشارات مش حمرا

مشرط : يا صلاة النبى .. يا مصبر الوحش ع الجحش يارب (لخشبة) سيبنى عليه وناخده بدل الجثة دا خنقنى (ويهم بضرب الدكتور)

خشبة : (يمسكه ويهديه) مواصفاته مش مناسبة

الدكتور : كان غيرك أخطر انا مأمّن نفسي بجهاز يو آر إس تو يو فى دبليو
إكس واى زد

مشرط : دى تعويذة دى ؟

خشبة : لا .. دا مأمّن نفسه بالحروف الأبجدية بالإنجليزى .. وبعدين دا مننا
وعلينا وبقينا عشرة وصحاب

مشرط : طب يا جدعان ما بلاش الجثة دى .. انا جتتى متلبشة

خشبة : بقولك إيه ؟ بطل خوف بقى .. إحنا ماصدقنا نلاقى جثة بالمواصفات
المطلوبة .. يبقى لها عفريت .. ليها جن .. ليها واسطة فى القسم .. مش هيفرق
معانا .. هناخدھا يعنى هناخدھا

مشرط : طب وهنمسكھا إزاي بس ؟

الدكتور : بطريقة التنويم الموسيقى .. ودى زى التنويم المغناطيسى بس بتدرّس
فى السيکشن اللى جنبه .. وبكدة نقدر نسيطر على العفريت وناخد الجثة ..
ونرجع العفريت للترب .. نودى الجثة للمشتري .. نقبض الفلوس وكل واحد
ياخد نصيبه .. ونخلص من الشغلانة النحس دى

مشرط : بس إحنا كدة محتاجين حد يعرف فى التنويم الموسيقى ده

خشبة : عيب تقول كدة والدكتور المهندس الأسطى موجود

مشرط : هو إنت بتفهم فى التنويم الموسيقى ده ؟

الدكتور : بيس .. أيام اندرستاند إن ذا اسكان فارماسى سيكولوجى ميوزيك

مشرط : (ينفعل ويخرج مطوة) هو بيغلط ؟

خشبة : لا مابيغلطش

مشرط : لو بيغلط .. ربنا يسامحه

خشبة : بس هو التنويم الموسيقى لجثة لها عفريت يختلف عن التنويم الموسيقى
للإنسان اللى عايش ؟

الدكتور : طبعا .. هنا بنحاول نراجع ذكريات الميت ونشوف إيه أكثر أنواع
الأغاني اللى كان بيحبھا .. وبما إنه موجود فى المقابر دى .. يبقى ميت فقير ..

يعنى أكيد سمع أغاني شعبي .. وعشان كدة جبت معايا أغنية شعبي .. هنسيطر عليه بيها .. أول ما الجهاز يلقط ذبذبات قوية هشغل الأغنية .. هو هيتأثر بيها .. ناخده ونمشي .. وكل شئ يبقى تمام

مشرط : يعنى إنت متأكد من اللى بتقوله ده ولا هتسوحنا

الدكتور : وات دو يو ساي .. أيام ريدي إن أنى تايم

مشرط : (ينفع و يخرج مطوة) هو بيغلط ؟

خشبة : لا مابيغلطش

مشرط : لو بيغلط .. ربنا يسامحه

(يدخل المحقق فجأة ينظرون له فى خوف _ يذهب لتفقدهم ويدور حولهم ثم يقف فى مواجهتهم)

المحقق : أهلا أهلا أهلا أهلا .. إنتو مين بقى ؟

خشبة : (بتوتر ولجلجة) إحنا .. إحنا بشر

المحقق: بشر .. بسم الله ما شاء الله .. مع إن مش باين عليكوا

الدكتور : (بخوف) فعلا .. شكلنا مختلف شوية

مشرط : (بقلق) آه فعلا .. إحنا شكلنا متخلف شوية

الدكتور : (بحماس لمشرط) بقول مختلف .. وإنت بالذات تسكت لتكشفنا

المحقق: (يتقدم لهم) وإيه بقى اللى جابكوا هنا ؟

خشبة : (وكأنه وجد مبرر وفكرة) .. جايين نتعظ

المحقق: تتعظ؟! (يشير إلى مشرط) .. والواد ده جاى يتعظ معاكم ؟

مشرط : (بخشوع) أيون يا باشا .. أنا جاى أتعظ

المحقق: طب وريني ياىض بتتعض إزاي؟
(يقف مشرط لا يعرف ماذا يفعل / يبكى/ يضحك / يرقص/ يدجل/ ييخر/
يرقص/.... إلخ)

المحقق: إنت كدة بتتعض .. والّا بتحضر عفاريت .. إنتوا دجالين ؟!

خشبة : لأ .. كله إلا كدة .. إحنا ناس محترمة

المحقق : وجيتو هنا ليه ؟

(يجتمعون معا ليتحاوروا سريعا _ فيتقدم الدكتور للمحقق بينما يتمدد خشبة
على خشبة المسرح _ ويقف بعيدا مشرط يبكى بكاء مصتنع _ يقلدون مشهد من
فيلم الطريق إلى إيلات)

الدكتور : (يؤدى التحية العسكرية للمحقق) .. إحنا جنود مصرية حدفتنا
الطيارة الهليكوبتر هنا.. ومعرفناش نرجع والأوامر بتقول نسلم نفسنا

خشبة : عملوها الوحوش

مشرط : (ببكاء) ياريتنى كنت معاهم .. ياريتنى كنت معاهم

المحقق: (بغضب) .. بس ياىض إنت وهو

(يجتمعون مرة أخرى ليقفوا بجوار بعضهم)

المحقق : بطايكم

(يتقدم الدكتور ثم خشبة يعطونه البطاقات عدا مشرط يعطيه بطاقة التموين)

المحقق : وإنت ماشى ببطاقة تموين ليه ؟ حضرتك إزارة زيت؟

مشرط : لا مؤاخذة يا باشا .. إتفضل (يعطيه بطاقة)

المحقق : (يدور حولهم _ بينما هم فى حالة خوف وقلق) بصوا بقى .. فيه
إخبارية بتقول إن فى تنظيم سري من الشباب لزعة أمن واستقرار البلاد ..
وإحداث بلبله

خشبة : (بخوف) بلبله و زعزة؟

مشرط : (ببكاء) بلبله و زعزة؟

الدكتور : (بتوتر) بلبله و زعزعة؟
خشبة : هى حصلت بلبله وزعزعة ؟
الدكتور : يا باشا إحنا ولا قد بلبله ولا قد زعزعة

المحقق : (لمشرط) وإنت ملكش فى البلبله ؟
مشرط : يا باشا إحنا بلبلنا على روحنا خالص .. (بحسم) إحنا من الآخر ..
حرامية جثث

الدكتور : الله يخرب بيتك إيه اللى بتقوله ده ؟
خشبة : وديتنا فى داهية

مشرط : ولا داهية ولا حاجة .. حرامية .. إحنا حرامية .. (يقلد حسن حسنى
فى فيلم غبى منه فيه) يا أم نياضى صحى نياضى .. قوليله مشرط حرامى
الدكتور : (بتأكيد) .. أيوة يا باشا إحنا حرامية وجايين نسرق جثث ونبيعها
خشبة : حتى إنت؟

الدكتور : (لخشبة) .. بقولك إيه .. حرامية جثث كبيرنا نتسجن سنتين تلاتة ..
ونخرج نص المدة فى عيد الشرطة .. إنما لو وصلت لببله و زعزعة يبقى
هنروح ورا الشمس ومحدث هيعرف إحنا فين أصلا

خشبة : (متفهما كلام الدكتور _ يذهب للمحقق) .. أيوة يا باشا إحنا حرامية
وجايين نسرق جثث

المحقق : يعنى مالكوش علاقة بمظاهرات ولا إعتصامات ولا تجمعات ولا
ناويين تعملوا ثورة

الدكتور : أنا راضى ذمتك .. (يشير لمشرط وخشبة) دى أشكال ثورة
المحقق : مميمم .. طب خدوا بطايقكم .. سلامو عليكم

(يخرج المحقق فى بساطة تامة)

مشرط : وعليكم السلام يا باشا .. نورت التراب

الدكتور : (يجلس) الحمد لله .. كنا هنروح فى داهية

مشرط : (بفرح ورقص) أنا اللى أنقذتكم وقلت إننا حرامية

(يجلس الدكتور منهارا _ ينظرون لبعضهم فى تعب وفرحة ثم يضحكون)
خشبة : (يقف) شغل الأغنية بقى خلىنا نصطاد الجثة ونخلص فى اليوم الهباب
ده

(يقوم مشرط بتشغيل أغنية شعبى _ يرقصون ويتحركون بالتسجيل فى اتجاهات
مختلفة _ يدخل مديح يرقص معهم ثم يخرجون جميعا)

اللوحة الرابعة عشر

(تدخل امرأة فى أواخر الأربعينات) مندفعة وغاضبة إلى المقابر وتبحث عن من
كانوا فى المقابر ولا تجد أحد)

المرأة : بقى يعنى فاكرين لما تستخبوا مش هعرف أجيبكم .. أنا وراكم والزمن
طويل .. بقى تقعدوا تعملوا دوشة وتسهرولى طول الليل وأول ما أنزلكم تستخبوا
.. (تذهب إلى أحد الجوانب من المسرح) ..

المرأة : أنا عارفة إنكم سامعنى ومش بعيد تكونوا شايفنى وأنا مش شايفاكم ..
وهقولها لكم المرة دى ومش هكرر كلامى تانى .. أى حد هسمع صوته ولا أشم
نفسه هنزل أعلقه من قفاه .. مش هيهمنى هو مين ؟ (تجلس على المقبرة) .. أنا
من ساعة ما سكنت هنا جنبكم وأنا كل يوم أسمع دوشتكم وأقول خلاص .. هيسكتوا
.. هيربحوا .. هيتخمدوا .. لكن سايقين فيها .. التربى اللى هنا ولا عارف ينش ولا
يهش .. ولا عارف يتصرف معاكم .. وسايب المكان سداح مداح للى يسوى واللى

مايسواش يدخل ويربع .. ويعمل اللي هو عايزه ويمشى .. (تقف وتتحرك للأمام)
.. أنا بقى مابقتش أخاف من الترب .. ولو لمحت حد جه هنا هنزله ..

(تتراجع)

(بنبرة حزن) .. هو أنا عشان قاعدة لوحدى فاكرينى هخاف منكم .. ولا عشان
ماليش حد هخاف حد يتخانق معايا .. (بقوة) .. أنا قاعدة لوحدى بس بميت راجل
.. ومش بخاف ..

(بحزن شدشد وتجلس) أنا كنت بخاف زمان .. كنت بخاف أخسر حد أو أزعل
حد أو حد يسيبنى ويمشى وأفضل لوحدى .. كنت بخاف إنى أكبر ألاقى نفسى
ماليش حد .. أو إن ماحدش يسأل عليا .. لكن خلاص .. مابقتش اخاف .. عارفين
ليه ؟

.. (تبكى) عشان بقيت لوحدى .. ماليش حد غير نفسى وشغلى وبيتى الصغير
اللى جنبكم .. ومش خايفة .. (تقف) .. سامعين .. انا مش خايفة .. ولو شفت حد
فيكم (بلبلجة) .. همو .. هض .. أأأ ..

(تترجع وتمسح دموعها) هتكلم معاه .. هسمع منه هو جاى هنا ليه وخلاص ..
هقوله إنى قادرة أعتمد على نفسى .. هحكيه أنا ليه كنت بخاف زمان ودلوقت لأ ..
هقوله إنى بقيت أعرف أعمل حاجات كتير لوحدى ..

(تحكى فى هدوء وتتذكر الماضى بحزن) .. طيب هحكيه عن حبيبى اللى سابنى
رغم إنى عمرى ما زعلته .. هقوله أهلى مابقوش طابقى .. والناس بتبصلى بصات
غريبة .. هقوله حاجات كتير أوى .. بس حد فيكم يطلع وأنا أقوله .. ولّا الحاجات
دى تزعل ؟؟

(بتوتر) .. طيب هقوله نكته .. نكته بتضحك أوى ..

(تحكى بحزن شديد) .. مرة واحدة فكرت إنها تعيش براحتها من غير ما حد
يضايقها .. قالوا عليها مجنونة (تضحك) ... مش بالذمة نكته تضحك ..

(تتفقد المكان وتبحث مرة أخرى فى كل ركن من المسرح ثم تقف)..

المرأة : برده ماحدش هيطلع يكلمنى .. إوعوا تكونوا خايفين منى وفاكرتّى مجنونة
.. هو أنا عشان زعقت شوية أو إترفزت .. ما ده أنا بعمله عشان ماحدش
يستضعفنى .. ماحدش يفتكر إنى طيبة .. عشان الطيبين ما بقاش ليهم مكان خلاص
... أنا .. أنا .. أنا حاسة إنى تعبانة .. أنا هطلع آخذ أى مضاد حيوى وأنام ..

(تتحرك ثم تعود بقلق ..)

المرأة : (بخوف) .. خيفة أتعب أكثر مالمقيش حد جنبى .. (ترفع صوتها).. طب لو لقيتوني غبت كثير .. إسألوا عليا .. عشان ممكن يعنى أأ .. أموت وماحدث يعرف .. (لحظة صمت)
أنا هسيب الباب مفتوح عشان لو جيتم تسألوا .. أو .. أو بلاش .. أنا هقفلوا بالتلات ترابيس عشان أنا لوحدى و .. و .. خ ا ي ف ة .. خيفة أوى ..

(تخرج)

اللوحة الخامسة عشر

(يدخل " على " فى حالة حزن يتبعه الآخرين فى حالة إستهجان وكأنهم مغصوبين على شئ _

"على" شاب فى العشرينات صنايعى يتسم بالجدية والمسئولية ،

آية امرأة فى الثلاثينات ربة منزل مغلوبة على أمرها ترتدى عباية سوداء ،

عبدالله الأخ الأكبر .. طبيب .. يرتدى بدلة

مصطفى شاب فى أواخر العشرينات يرتدى الجينس وتيشيرت ، يبحث عن مصلحته فقط

الجبالى : شاب فى الثلاثينات ملتقى بسيط فى ملابسه لا يفكر إلا فى مصلحته

يوسف : شاب عشرينى لا مبالى بأى شئ وخائف دائما)

_ بمجرد دخولهم يذهب كل شخص فى جانب فى قلق وانتظار _

على : (يتفقد أحد المقابر التي دفن بها والده) .. الله يرحمه .. كان نفسه يشوفكم متجمعين كدة فى آخر أيامه .. لكن ماحصلش نصيب مات قبل ما يشوفكم سوا

آية : الله يرحمه

على : أنا بقى كان نفسى فعلا نكون متجمعين عشان ندعيه بالرحمة .. (ينظر لهم بأسى) .. كل واحد فيكم جاى عشان مصلحته .. (ينظر لعبدالله) .. واضح إن أبونا معرفش يربى

عبد الله : (يذهب لمواجهة على) ما تحترم نفسك يالا .. لو على التربية فإنت أول واحد محتاج يتربى عشان تحترم اللي أكبر منك

على : أنا آسف .. آسف يا كبير .. أول مرة أعرف إن ليا إخوات كبار .. بس كان نفسى يكونوا فعلا كبار بأفعالهم مش بسنهم

آية : إحنا مش جايين نتخانق .. (تلتفت لتفقد المكان) وبعدين مش عايزين حد يحس بينا هنا

على : (مخاطبا آية) .. قولى للدكتور .. الدكتور اللي ماجاش يطمئن على أبوه من ساعة ما إتجوز وفتح عيادة .. وبقي يستعير يقرب من الشقة اللي فى الدور الأرضى اللي دايمًا المجارى مش مفارقها .. خايف حد من الزباين يعرف إن الدكتور عبد الله حسن .. هو نفسه ابن حسن الجزمجي اللي فضل لابس نفس اللبس 12 سنة ما إشتكاش ولا قال آاه .. (مخاطبا الجميع) .. وكل ده عشان يعرف يصرف عليكم ويطلعكم أحسن من الناس

مصطفى : مالوش لازمة الكلام ده دلوقت .. كلنا قصرنا فى حق أبونا

على : لااا مش كلنا .. ولما تيجى تتكلم عن التقصير ما تجمعنيش معاكم .. أنا طول عمرى جنبه وعمرى ما فارقتة .. طول عمرى قاعد فى الورشة معاه .. لا عمرى اشتكيت ولا قلت لأ .. (ينظر لعبدالله) .. طول عمره بيعاملنى على إننى الكبير اللي لازم أورث المهنة من بعده .. سببت المدرسة من إعدادي عشان نجيب لكم الفلوس .. عشان تعرفوا تكملوا تعليمكم .. وأولكم الدكتور ..

على : (يذهب له لمواجهة) .. دروس الثانوية كلها وفلوس الجامعة واللبس اللي كنت بتتباهى بيها قدام زميلك .. أنا اللي تعبت وسهرت فى الورشة عشان تجيها .. كنت بستحمل طريقة أصحابي على القميص اللي كنت بغيره كل اسبوعين عشان أشوفك لابس قميص جديد .. وأقولهم بصوا .. أخويا فى كلية الطب .. واختك

وجهازها .. اللى فيه حجات لغاية دلوقت قسطها لسة ماخلصش .. أكلكم وشربكم
ومصاريفكم طول عمركم .. أنا اللى متكفل ببيها

عبد الله : ما تقلش إنت اللى متكفل ببيها .. إنت رضيت تسبب المدرسة وتشتغل ..
أبونا هو اللى صرف علينا .. وإذا كان حد ليه الفضل يبقى أبونا مش إنت .. إنت
كنت بتقبض كل اسبوع زيك زى أى حد فى الورشة

على : لو كان زيي زى أى حد ما كناش بنينا بيت 8 أدوار وفى الآخر تورث زيك
زيي

مصطفى : (لعلى) .. قول كده بقى .. هو دا اللى مضايكك .. إنك هتاخذ زيننا فى
ورث أبونا

الجبالي : يا جماعة استهدوا بالله

يوسف : لو عليتم صوتكم تانى مش هيبقى فيه ورث ولا عمارة

آية : يا جماعة إحنا جايين نحل مشكلة مش نتخانق

عبدالله : نحل المشكلة بالأدب والإحترام .. أنا مش جاي هنا عشان أقل من نفسى

مصطفى : يا جماعة .. شوفوا هنعمل إيه عشان نمشى من هنا

على : مستعجلين ؟ .. مش كنا قعدنا مع بعض شوية .. إحنا ماشفناش بعض من زمن

يوسف : (بخوف) .. نخلص من الموضوع ده وبعدين ربنا يحلها

مصطفى : إحنا كل ما نتجمع يحصل بينا مشاكل وخناقات

عبدالله : مش وقته دلوقت .. شوفوا هنعمل إيه عشان نخلص ونمشى

على : مش الأول نقرا الفاتحة لأبوكم وندعيه ربنا يرحمه ويغفر له

الجبالي : ويغفر لنا احنا كمان فى المصيبة اللى هنعملها دى

عبدالله : (بغضب) دى مش مصيبة دى حقنا .. ومافيش حل غير كدة

على : إقروا الفاتحة وبعدين نتخانق

يوسف : ربنا يرحمه دا كان طيب أوى .. كان مرة دفع فلوس عملية لعم عادل جارنا
ومارضيش ياخذ قرش من حد وإتكفل ببيها لوحده

الجبالي : وكان بيدفع للجامع كل شهر فلوس عشان تتوزع ع الناس الغلابة

عبدالله : (بإستهتار) وكان كل ما حد يتسرق جزمته يديله جزمة من الورشة ببلاش
على : كان طيب أوى الله يرحمه .. مرة كنا رايعين مشوار نجيب بضاعة .. وفضلنا
مستنيين اتوبيس 16 ماجاش اتوبيس 16 .. مستنى اتوبيس 16 ماجاش اتوبيس 16 ..
ركبنا اتوبيس 8 رايح جاى

آية : إنت جاى تهزر وأبوك ميت

على : ماحدش واخذ منها حاجة .. ماكلنا ضحكنا وهزرننا وكل واحد شاف حاله بعد
ما أبونا مات .. إحنا بقالنا 3 شهور ماحدش فينا زاره

عبدالله : (يتشابكان) .. إنت عيل ما عندكش دم

على : وانت قليل الادب

الجبالى : (يسلك ما بينهم) .. يا جماعة استهدوا بالله .. إحنا كدة هنروح فى داهية

على : خلاص .. اسكتوا

(يخرج من جيبه عقد وحبارة)

على : كل واحد فيكم معاه العقد بتاعه ؟

الجميع : أيوة

على : تمام .. كل واحد هيبقى شقته تملك بتاريخ قديم .. بس ماتنسوش الفلوس اللى
هندفعها للموظف بتاع الشهر العقارى عشان يسجل العقود بتاريخ قديم

عبدالله : طب بالنسبة للورشة

على : (بغضب شديد) .. مالها الورشة .. الورشة طول عمرها معايا .. حتى بعد ما
أبوك تعب .. أنا اللى شايها لوحدى .. هو حد فيكم قرب من الورشة أو يعرف عنها
حاجة

مصطفى : وإنت لو أخذت نصيب فى الورشة يا دكتور هتعمل بيها إيه ؟

على : يمكن ينزل يقف معايا .. ويبقى الأسطى بدل الدكتور .. ويعالج نعل الجزمة
بالأنتوبيوتك

عبدالله : (يتشابكان) .. إنت عيل قليل الادب

على : وإنت مش محترم

الجبالي : يا جماعة استشهدوا بالله .. عايزين نخلص

على : (بإصرار وتهديد) .. الورشة بإسمى واللى مش عجبته يطلع جثة أبوه بنفسه
ويبصمه على العقود

(الجميع ينظرون لبعض فى حالة استسلام)

يوسف : (بتحذير وخوف) .. لو مالحقناش نخلص العقود .. الضرايب هتحتجز على
العمارة والورشة .. ولا هنطول منها حاجة

آية : وهى لما تبقى تمليك مش هتحتجز عليها ؟

على : لأ .. الضرايب على ابوك .. هتتاخذ من ممتلكاته .. يعنى من البيت والورشة
إنما لما تبقى العقود بإسمنا بيع وشراء بتاريخ قديم يبقى سلمى على الضرايب بقى

يوسف : (خائفاً) .. ربنا يستر

عبدالله : (يذهب ل على) .. مش كنت خلصت الحوار ده لوحدك ؟

على : لاااا .. لازم تبقوا كلكم معايا .. وبعدين إنتوا وحشتونى قلت مافيش أحلى من
المناسبة دى عشان نتجمع فيها .. (لمصطفى) عشان ماحدش يقول مش فاضى (لعبدالله)
أو مشغول .. (ل آية) .. أو جوزى مش موافق وحلف عليا بالطلاق

آية : إنت قليل الأدب

على : هو كل حد فيكم يقولى إنت قليل الأدب .. إنت قليل الأدب .. وإنتوا الللى
متربيين أوى

عبدالله : (يتشابكان) .. إنت مش محترم

على : وإنت مهزء

الجبالي : (يسلك بيهم) .. يا جماعة استشهدوا بالله

عبد الله : هو كل شوية هنتخانق .. واضح إن وجودنا مع بعض ببجيب المشاكل

وأحسن حاجة إننا مابنتجمعش

على : يبقى كويس إننا نخلص الحوار ده النهاردة .. وكل واحد يبقى فى حاله ..
خلينا إخوات فى البطايق بس

مصطفى : أحسن ... أنا كده كده مسافر ... ياريت محدش يكلمني في مشكلة تانية

عبدالله : وأنا هبيع الشقة وافتح عيادة ... ياريت محدش يوجع دماغي منكم

أيه : وأنا جوزي ما بيطفش حد فيكم .. ياريت محدش يزورني ويجبلي مشاكل
يوسف : وأنا هعمل اللي على مزاجي محدش ينصحنني ولا ليه دعوة بيّا
على : ونعم الإخوات .. بس ياريت يكون القدر كويس معانا وما يجمعناش تاني
وربنا يوفق كل واحد في طريقه وفي حياته
الجميع : يا رب
على : تعالوا نقرأ الفاتحة قبل ما نطلع جثة أبوكم عشان ربنا يغفر لنا
(الجميع يقرأ الفاتحة)

(إظلام تدريجي)

اللوحة السادسة عشر

(تدخل ندى ورحمة لتفقد المكان بينما تقف ليلي واثقة وتراقبهما _ ليلي فتاة فى
الثلاثينات _ محبة)

ليلى : هنا بقى ماحدش هيضايكم ولا هيرخم عليكم .. (لندى) ولا هيقعد يبص
فى عيونك ولا هيعملك أشعة مقطعية على جسمكم .. (للجميع) ولا هتسمعوا
كلام قلة أدب

ندى : (لرحمة فى همس وخوف) بقولك إيه أنا عايزة أسمع كلام قلة أدب وما
أقعدش هنا

رحمة : إستنى بس .. (تتجه ل ليلي) بس إنتى مش شايفة يا ليلي إن المكان
غريب شوية !!؟

ليلى : ولا غريب ولا حاجة .. (تجلس) .. إيه اللي هيخليه غريب يعنى .. إحنا مش كدة كدة بنقعد سوا نرغى ونتكلم ونهزر .. هنا ممكن نعمل أى حاجة .. تعرفوا .. إحنا ممكن نلعب هنا (أولى) فاكربين اللعبة دى

(تقفز بقدم واحدة وكأنها تلعب اللعبة)

ليلى : .. أو نلعب (كهربا) أو (إستغماية) وماحدش هيقولكم أى حاجة .. بالذمة ينفع حد فيكم يلعب أى لعبة فى أى مكان .. من غير ما يخسر كرامته ويتهان .. ويسمع كلام من اللي يسوى واللى ما يسواش ؟

ندى : (بخوف) أنا عايزة ألعب عسكر وحرامية ... إنتوا العسكر وانا الحرامية .. أجرى أنا .. وإنتوا إبقوا حصلونى

(تجرى ندى فعليا وتحاول الهرب)

رحمة : (تمسك بها) .. مسكتك

ندى : (بغضب من رحمة) .. إحنا لسه ما لعبناش

رحمة : (بحزن) .. ما أنا مش عايزة أبقى عسكر .. أنا ممكن أبقى حرامية أحسن ..

(ندى ورحمة يتهامسان بينما ليلى تراقبهم من بعيد غير مبالية بما يحدث)

رحمة : بقولك إيه .. دى صاحبتنا ولازم نبقى معاها شوية

ندى : نبقى معاها بس مش هنا

رحمة : هنا أو هناك مش فارقة دى مهما كان صاحبتنا وكلنا معرضين إن يحصلنا صدمة أو حالة نفسية

ندى : بس ده بقى جنان مش حالة نفسية

ليلى : (تقترب ليلى منهم) بتجيبوا فى سيرة مين ؟!

ندى : (فى لجلجة) أبدا .. دا إحنا بنقول يعنى ..إننا مثلا .. مثلا نروح نشرب حاجة على أى كافييه .. إيه رأيك ؟

ليلى : لأ.. أنا بقيت أستريح هنا .. عايزين تمشوا إنتوا .. ممكن تمشوا

ندى : (تنظر فى الساعة بسرعة جدا) .. ياااه الوقت بقى متأخر.. مبسوطه إنى شفتك جدا.. (تبوسها) .. مع السلامة

(تخرج)

رحمة : (تذهب ل ليلى) .. وهنسيبك هنا لوحذك ؟

ليلى: ماتقلقوش .. أنا طول عمرى لوحدى .. وباجى هنا لوحدى كثير .. هقعد شوية مع نفسى وهمشى

(تعود ندى وتقف جانبا فى حالة حزن)

رحمة : ما تيجى معانا .. إحنا يا دوب نشرب حاجة ونروّح .. إنتى عارفة إننا ماينفعش نتأخر عشان ماحدث يضايقنا فى الطريق

ليلى: يعنى لو روحتوا بدرى ماحدث هيضايقكم ؟!

ندى: بس فيه ناس فى الشارع .. يونسونا .. ولو حد زوّدها .. الناس مش هيسيروه

ليلى : إحنا عارفين كويس إن الناس مابقتش تتكلم .. بقوا يتفرجوا بس .. الشهامة بقت فى الافلام القديمة بس ..

(تعود للجلوس)

ليلى : مع السلامة .. خلوا بالكم من نفسكم .. إحنا مالناش إلا بعض وبس

رحمة : (ترجع لها) مش محتاجة أى حاجة ؟

ليلى : شكرا.. (توقفهم قبل خروجهم) .. عايزة أقولكم حاجة

(تقف تذهب لهم بهدوء)

ليلى : أنا مش مجنونة .. أنا شايفة الدنيا على طبيعتها .. إنتوا يمكن اللى عنكم وعقلكم مخليين الدنيا جميلة .. أو حتى مقبولة .. بس للأسف أنا مش شايفها كده

.. أنا نفسى أبقى زيكم أسمع المضايقات وأقول عادى كله بيعدى .. أتخطب وأنا ماشية .. وأرجع اتفرج على فيلم رومانسى وأنسى .. أشوف الستات بتبصلى على إنى بايرة أو معنسة لأنى عديت 30 سنة .. وأضحك فى وشهم وأقولهم

(ترد على الجمل كأنهم موجودين)

ليلى : ربنا يخليكى يا طنط .. ربنا يخليكى يا طنط .. ربنا يخليكى يا طنط

(تقوم ليلى بتقليد السيدات باختلاف شخصياتهم وأصواتهم)

ليلى : .. "عقبالك يا حبيبتي" .. " أمه داعياله" .. "نباركلك يوم فرحك" .. "مش هتفرح بيكى بقى" ؟

(تتوقف غاضبة وتعود لشخصيتها)

ليلى : لأ لأ لأ ... مش هتفرحوا .. عشان أنا بنى آدمة من حقى أعيش واحب واخرج وافرح واشم هوا نضيف .. (تذهب ل ندى) .. أنا مش مجنونة يا ندى مش مجنونة .. وأى كلمة بسمعها بتأذيني ومش بقدر أفوت .. ولما بسمع كلام عن جسمى بتضايق .. ولما بحس إننا ماينفعش نضحك ولا نعبر عن نفسنا بتخفق .. ولما بعد كل ده ييجى الناس ترمى اللوم علينا .. فأتمنى الموت .. أبقي عندى حق .. أيوه أنا بتمنى الموت .. هو احنا من إمتى كنا عايشين فى البلد دى .. إمشو .. وإقعدوا إضحكوا على الكلام اللى بيتقالكم فى الشارع .. أنا مش بلومكم على حاجة .. ما إنتوا لو معملتوش كده مش هتعرفوا تعيشوا .. هتبقوا زيي .. مجنونة

(تتراجع لتجلس)

ندى : (تذهب لها مواسية) .. أنا آسفة

رحمة : أنا مش عارفة أقولك إيه ؟

ليلى : متقولوش حاجة (تقف فجأة وتمسح دموعها وهى تقول) .. تلعبوا

ندى : (مستغربة) نلعب ؟!

رحمة : (مترددة) .. بس يعنى ؟!

ليلى : عشان الدموع يعنى .. خلاص .. أهى ..

(تمسح دموعها أكثر وتجرى للأمام)

ليلى : يالا .. تعالوا نلعب صلح .. أو أقولكم نلعب الغمازة .. أنا لسة معايا الأرقام من آخر مرة لعبناها سوا

(تذهب للشنطة وتخرج منها ورق صغير _ يجلسون فى ركن من المكان على الأرض ليلعبوا الغمازة)

(أثناء جلوسهم يدخل الشباب الحشاشين شكشك / محسن / شلبى)

شلبى : (يتقدمهم فى الدخول) .. يالا يا ابنى إنت وهو عشان نلحق أأ

(يرى البنات _ وينبه الشباب لوجودهم _ ف يتهايمسون)

شلبى : نلحق .. نلحق نقرا الفاتحة .. وغير كدة نلحق نقرا الفاتحة

شكشك : (باستغراب) .. إيه ده مين دول ؟

محسن : (بخوف) إحنا روحنا فى داهية

شكشك: بس .. ولا داهية ولا حاجة.. إحنا جايين نزور واحد من الميتين اللى هنا

شلبى : ومين بقى المرحوم ؟

محسن : (بخوف) أى حد وخلاص .. (بتوتر) .. أنا خايف يبلغوا عننا

شكشك : هيلغوا يقولوا إيه ؟ جايين نقرا الفاتحة واحنا مش متوضيين.. وبعدين شكل الميت كان عزيز عليهم .. قاعدين يدعوله ومركزين ..

(يذهب للفت انتباههم حتى تكون الأمور طبيعية)

شكشك : إحم إحم .. أكح كح

(يلتفت البنات وتنهض _ ندى ورحمة فى حالة خوف وتوتر بينما ليلى واثقة جدا ومستغربة من وجود أحد فى المقابر)

ندى : رحنا فى داهية

رحمة : بس .. إسكتى

ليلى : (تذهب لمواجهتهم) .. إيه ده .. إنتوا مين ؟!

ندى ورحمة : أيوه .. إنتوا مين ؟!

محسن : إحنا جايين نزور واحد ميت ونظمن على صحته وماشييين على طول

ليلى : إسمه إيه الميت ده ؟

ندى ورحمة : إسمه إيه الميت ده ؟

شكشك : إسمه.. إسمه.. (يقوم شلبى بتلقينه إسم أحد الموتى) .. إيه ؟ آه .. فايق .. أ / فايق

رحمة : وانتوا تعرفوه منين ؟!

شلبى : ده المدرس بتاعنا .. وغير كده المدرس بتاعنا

ندى : دا كان برودو بيشرحلنا المنهج حلو أوى

شكشك : شوف الصدف.. يااااه .. وكنتى بتفهمى منه حاجة

ندى: آاه .. (ترتجل للخروج من الموقف) .. خصوصا درس الكواكب والغابات والهندسة

شكشك : (يخشى أن تكون هى على حق فيرتجل هو الآخر) الهندسة الوراثية فعلا كان بيشرحها كويس.. ربنا يمسيه بالخير

ندى : ربنا يحفظه ويطول فى عمره .. ويغفر ذنوبه ويدخله الجنة

شكشك : اللى زى أ / فايق طبعا لازم يدخل الجنة

ندى : آاه فعلا .. الجنة وأ/ فايق .. تحس إن فيه توافق كدة

شكشك : (يحاول الهروب) طب.. إحنا خلاص كدة .. (ينظر لهم) قریتوا الفاتحة يا رجاله صح ؟ .. يلا عشان نلحق نلف .. ونرجع تانى

محسن : (فى لخبطة) .. إحنا رايعين نجيب القُرص وراجعين على هناك بقى (يخرجان بينما شلبى يحاول جمع الأكل وال mp3 وجمع الاكسسوارات)

شلبى : إنتو رايعين فين ؟ هتسيبوني لوحدى هنا

ليلى : حلقوا عليه

(تنزل طبله الزار من فيلم ريا وسكينة .. يتحولون إلى شخصيات مخيفة .. يتراجع شلبى فى خوف ويتجمد مكانه .. يحيطون به)

ليلى : إنت بقى هنخلص منك القديم والجديد .. واللى عملوه فينا الرجالة على مر التاريخ

ندى : إحنا هنسلك ونقطعك طرنشات .. ونعملك صينية فى الفرن

رحمة : إحنا هنعملك سندوتشات بالسلطة

شلبى : (فى رعب) .. مش بحب السلطة

ليلى: إخرس .. إحنا هندفنك هنا

شلبى : (ببكاء) .. يا جماعة وأنا مالى .. أنا ذنبى إيه أشيل كل الليلة لوحدى

رحمة: إنت مش راجل ؟

شلبى : (بخوف وتوتر) .. مابقتش متأكد

ندى: آمال الشنب دا إيه ؟

شلبى : دا بالقلم الفلوماستر

(تنزل أغنية حسرة عليها من فيلم ريا وسكينة يتم عليها تشكيل حركى)

(يدخل المحقق فجأة فى نهاية الأغنية)

المحقق : إيه اللى بيحصل ده ؟

شلبى : (ينهض شلبى ويجرى نحوه) .. استر عليا ربنا يستر عليك

المحقق : إمشى إنت .. ربك ستار حلیم

(يخرج شلبى من المسرح _ يذهب المحقق لتفقد ندى ورحمة ثم يذهب ل ليلى)

المحقق : (بهدوء) إيه يا ليلى .. أنا مش قلتك بلاش تيجى هنا ؟

ليلى : المكان هنا بيریحني .. ومش هسمح لحد إنه يمنعي آجى هنا

المحقق : أنا أخوكى الكبير وأعرف مصلحتك

ليلى : وأنا مش صغيرة عشان حد يوجهني .. أظن لغة الأوامر دى فى الشغل

وبس

المحقق : وببتهياي إني مأمركيش .. إنتي أختي وعائز مصلحتك .. دا وقت العلاج .. وأظن أصحابك مش هيعارضوا إنهم ينورونا فى البيت وتكملوا كلامكم براحتكم

ندي : (بفرح) أنا معنديش مانع خالص .. هو فيه أحلى من قاعدة البيت ؟

رحمة : (بفرح) يلا يا ليلي .. الوقت إتأخر .. وأخوكى عنده حق

ليلي : تحت أمرك يا حضرة الضابط

(يخرجون وأثناء الخروج يسأل)

المحقق : ما قابلتوش شوية عيال بيخططوا لثورة ؟!

الجميع : لأ

إظلام

اللوحة السابعة عشر

(شهریار وشهرزاد جالسين على أحد الشواهد يلعبوا كوتشينة)

شهریار : الحدوتة دى من أحلى الحواديت اللى سمعتها منك

شهرزاد : كل حدوتة وليها طعم مختلف .. كل حدوتة ولها رسالتها .. وكمان متنساش إني حيايتى متعلقة بحدوتة .. ودا يخلينى آخد بالى كويس

شهریار: الفكرة إن الحدوتة فعلا تساوى حياة .. وكأنها تجربة الواحد مر بيها فى حياته .. ولولا الحواديت كان الواحد عاش حياة واحدة بس .. إنما كل ما يسمع حدوتة .. كأنه بيعيش حياة ثانية

شهرزاد: مش بتحس إن الناس غلابة أوى من الحواديت ؟

شهریار: عارف.. بس دى سنّة الحياة .. لازم يبقى فيه غلابة وفيه ملوك .. لازم يبقى فى شر .. عشان يبقى فيه خير .. فيه أبيض وأسود , حياة وموت .. نور وعتمة .. قصور وقبور .. (يقف) .. وبعدين إنتى ناسية إن لولا الغلابة مش هيبقى فيه فساتين ولا ماكياج

شهرزاد : مش ملاحظ إنك بتحاول تذلى بالموضوع ده وبتأكد عليا كل شوية

شهریار : أنا بحاول أفكر

شهرزاد : وأنا مش بحب الموضوع ده .. ماكنتش شوية فساتين جبتهم .. إنت عمرك ما عملتلى حاجة

شهریار: (مستغرب) عمرى ..

(يتشاجران بصوت عالى)

شهریار : أهو إنتوا كدة يا نسوان .. مهما الواحد عمل عشانكم بترجعوا تنسوا كل حاجة

شهرزاد : إنتوا بتحبوا تعيشوا فى الدور .. وتحسوا نفسكم إنكم مسيطرين وخلص

شهریار : دى مش سيطرة .. دى سنّة حياة .. وإحنا اللي لازم ندير الدفة وإلا نغرق

شهرزاد : دى عنظة رجالة وكلام مالوش أصل .. إنتوا لو ماتحكمتموش فى حاجة بتحسوا بالنقص .. إنتوا بتمارسوا سلطتكم حتى على ريموت التليفزيون

شهریار : مش أحسن ما نتفرج على مسلسلات تركى 2000 حلقة .. ولا أمينة شلباية

شهرزاد: دى حياتنا وإحنا خرين فيها ..

شهریار: بس دا تضییع وقت وفضى .. طول النهار فاضيين وفى الآخر تشتكوا من شغل القصر يا شهرزاد

شهرزاد: أنا شائلة شغل القصر لوحدى ومفیش حد بیساعدنى

شهریار: من بكرة أجیلك جارية تساعدك

شهرزاد: مافيش جارية هتخش القصر يا شهریار .. عشان عنيك الزايغة

شهریار: أنا عینی زايغة ؟!

شهریار: كل الرجالة عنيهم زايغة

شهریار: وكل الستات نكدية

شهرزاد: نكديين لأنكم منكدين علينا عيشتنا

شهریار: دی مابقتش عيشة يا شهرزاد .. مش كل مرة تيجی فی وسط الحدوة وتنکدی عليّا

شهرزاد : إنت اللي كلامك مستفز .. دی مابقتش عيشة يا شهریار .. إندھلی مسرور أو طلقني

شهریار : مش هنده حد .. هو الموت بالساهل كدة .. ولو عايزاني أطلق .. إتنازلي الأول عن القايمة والذهب

شهرزاد: ذهب ؟! بلاش نجيب سيرته دا كان ذهب صيني

شهریار: شهر ز اااااااااا .. بلاش نكتّر عشان إنتی عارفة أنا ممكن أعمل إيه ؟

شهرزاد: هتعمل إيه يعني ؟ هتندھلی مسرور .. إنت بُق ولا تعرف تعمل حاجة

شهریار : (بغضب شديد) إنت عايزة إيه دلوقت ؟

شهرزاد : إندھلی مسرور لو راجل

شهریار : مسرور ؟! مش خايفة يعني .. ماشي .. (ينادی) مسرور.. يا مسرووووور

(تدخل أم كالوشة معها مقشدة وتنفقدهم من بعيد بينما كان شهریار ينظر لشهرزاد للتشفی فيها بحضور مسرور من خلفه)

شهریار : (يلتفت فجأة وبفزع) .. إيه ده ؟

(يجرى هو وشهرزاد ويختبآن خلف الشاهد "المقبرة ")

شهریار : إنتى مين والّا إنت مين .. (لشهرزاد) .. دا مش مسرور .. هو مسرور حصله إيه ؟ .. (بفزع) لتكون أكلته؟

أم كالوشة : (تقترب منهم).. مسرور مين ياض إنت وهى ياض .. إنتوا مين ؟ .. وإيه اللى انتوا عاملينه فى نفسكم دا .. وإيه اللبس الغريب ده ؟

شهرزاد : (تخرج لها من خلف الشاهد) إحنا مين ؟! (بفخر) أنا شهرزاد

شهریار : (يخرج ولكن بخوف) وأنا شهریار .. (بقلق) أنا الملك

أم كالوشة : أَلعب فى الزمبلِك هع هع هع (تضحك)

(يتراجعان ويمسكان ببعضهما البعض فى خوف)

شهرزاد : يعنى إيه زمبلِك يا شهریار (بخوف)

شهریار : مش عارف (بخوف) .. شكلها كدة شبه الوحش اللى طلع للسندباد أثناء الرحلة البحرية

شهرزاد : بس إحنا مش فى بحر يا شهریار

شهریار : يمكن وحش من البرمائيات

أم كالوشة : بتقولوا إيه ياض إنت وهى .. أنا مش ناقصة وجع دماغ .. الترب دى تحت سيطرة أم كالوشة .. وأنا بقى أم كالوشة .. ماركة مسجلة .. علامة تجارية .. ميد إن (made in) ترب الغفير

شهریار : (يهمس لشهرزاد) تعرفى تجري ؟

شهرزاد : لأ ..

شهریار : يبقى الله يرحمك .. هفتكرِك بالخير ...

(يجري شهریار من أم كالوشة ويخرج من المسرح)

(أم كالوشة تشمر أكمامها وتمسح فمها وكأنها سوف تلتهم شهرزاد)

شهرزاد : (بخوف ورعب وتحاول الإختباء) ..What are you doing?
إنتى بتعملى إيه ؟

أم كالوشة : هعملك مساج (تتحرك تجاهها)

شهرزاد : (تهرب منها خلف الشاهد) .. ثأنك يو (i'm very tired)

أم كالوشة: ودى تيجي ؟! .. تعاااالى

(تحاول أم كالوشة الإمساك بها بينما تحاول شهرزاد الهرب حتى تسيطر أم كالوشة عليا)

أم كالوشة : حلال الله أكبر

(تضربها بالقبضة .. شهرزاد يغمى عليها)

إظلام سريع

اللوحة الثامنة عشر

(يجلس حسن (المتهم) فى ركن بعيد من المسرح متوارى _مرتديا ملابس مهلهلة ..
(ونظارة وكأنه كفيف) .. يغنى .. _ بعدها تدخل نعيمة _ هى شخصية نعيمة المعروفة
فى التراث بحبها لحسن _

وقد أصابها نوع من الحزن والجنون الخفيف فى بحثها عن حسن)

نعيمة : (باحثة عنه فى المكان) حسن .. حسن .. (ثم تلفت فتجده) .. حسن !!

.. يا رب يا مجيب .. دعوة القلب واصلة .. شكرا يارب إنك جمعتنى بيه ..

(تذهب إليه) .. حسن

المتهم : حسن ؟!

نعيمة: مالك يا حسن .. إيه اللي جراك ؟!

المتهم: أنا مش حسن (لا يلتفت لها)

نعيمة : (فى إستغراب) .. مش حسن إزاي ؟! .. إن كانت العين بتكذب فالقلب عمره ما يتخدع فيك يا حسن

المتهم : (يهرب منها لكان آخر) .. أنا مش عارف إنتى بتتكلّمى عن مين ؟!

نعيمة : بصلى يا حسن .. بص لعيونى اللي كانت عزوتك .. أنا نعيمة اللي ياما غنيت لى

المتهم : العتمة اللي فى عيني مش مخليانى شايف

نعيمة : ومنين جت العتمة دى يا حسن .. لقانا نور وكلامنا لحن ببسعد الخلاق .. مش دا كلامك يا حسن ؟

المتهم : كان أحلى نور .. وأحلى لحن جمع الخلاق .. (يجلس) .. كان .. كنا كتف فى كتف .. كان قلبنا على قلب بعض .. كان اللي بيقع بيلقى ألف إيد تسنده .. دلوقت اللي بيقع بيغرق .. الألف إيد مسلمين .. آخرنا هاشتاج على تويتر يا نعيمة

("يغنى " : أنا ولا حاجة فى عيون الزمن .. لكن أغلى حاجة فى عيون الوطن .. أنا نور من نور)

المتهم : (يتوقف فجأة) .. مش أى حد يقدر يشوف النور .. النور حلم وكل واحد فينا طاقته على قده .. وده اللي وقّعنا .. ماكاناش شايفين نفس النور .. كل واحد شايف نوره وبس .. فينا اللي من أول يوم طفى نوره .. واللى بعده واللى بعده واللى بعده ..

(يقف) .. لحد ما فضلت أنا .. أنا واللى زىي .. ومن ليلتها .. ومن شدة النور .. مابقتش أشوف .. أو مابقتش عايز أشوف

نعيمة : يعنى إيه ؟! أنا تايهة عنك ؟ .. إيه اللي جراك .. بقى تبقى نعيمة قدامك وتدور وشك ماتشوفنيش .. وأنا بدور عليك من زمن

المتهم : اللي بيحبوكى كتير .. أكيد هتلاقى فيهم اللي يساعدك

نعيمة : ومين غيرك يقدر يقف فى وش العمدة وغفره .. العمدة اللي بيتحكم فيا وكأنى ورثه .. وأبويا راجل كبير ماعدش قادر يقف له .. مين هيقف غيرك يا حسن .. مين هيجيب حق الغلبة ويتكلم بلسانهم

المتهم : مين؟ .. ههههههه .. أنا ؟ ههههههه .. لو كنت أقدر أجيب حق الغلبة كنت جبت حق اللي راحوا .. أنا مابقاش ليا لازمة

نعيمة : لو مابقاش ليك لازمة .. يبقى أنا كمان ماليش لازمة فى الدنيا دى .. والموت أهون من إنى أشوفك عاجز

المتهم: الموت ؟!

نعيمة : إبقى إفتكرنى بالخير .. (تمشى للخروج)

المتهم : (ينادى) .. نعيمة .. تلتف وتقترب منه فى فرح)

المتهم : (بلجلة) أنا.. أنا .. (بحزن) الخوف يا نعيمة إتملك منى .. خايف ما أقدرش أحميكي .. خايف تروحي منى زى أصحابى اللي ماتوا .. وماقدرتش أعملهم حاجة .. كنت فاكِر إن كل البلد هتكون معايا لكن للأسف .. الخوف اللي إتزرع جواهم من سنين إتحدس سكوت وذل .. (بثورة) آخرة وقوفى إيه ؟ .. آخرتها تايه .. مش عارف فين أنا أو مين أكون ؟ .. أنا صح ولا غلط ؟ .. الحب والحلم بقوا مُحرمين عليا .. يا ما كان نفسى أكون السند ليكى ولغيرك من الغلبة .. لكن الحال إتغير .. إتسجنت عشان عايز العدل والمساواة بين الناس .. واللى ظلم واللى خان واللى سرق .. بقوا هما اللي يحاكمونى .. بقيت زى البلياتشو .. الكل بيضحك عليا .. مبقتش شايف غير ضحك الناس عليا .. الناس اللي عملت كل حاجة عشانهم .. كل ما أصرخ .. يضحكوا .. كل ما أقول حرام .. يضحكوا .. كل ما بيبكى يقولوا يستاهل .. ما بقتش قادر أصدق اللي جوايا من ناحيتهم .. ضحكهم عليا إتحول واحدة واحدة لسواد .. عتمة .. ظلمة ما أقدرش ما اصدقهاش .. حسيت إنى مش شايف أو بالأصح .. مش عايز أشوف .. أعمى ؟ .. أعمى أحسن من إنى أتجنن .. أعمى بس ماشفش الناس بتتمنالى الموت ويقولوا عليا طايش أو عميل .. أعمى بس الناس تفضل فى قلبى غلبة

(يجلس ويبكى ويرفع يده بالدعاء)

المتهم : ياااارب .. خليه غلبة فى قلبى .. يارب خليه غلبة (يبكى)

نعيمة : (بعد لحظة صمت) .. طب وأنا يا حسن .. نسيتهنى ؟

المتهم : عمرى ما أنساك إنتى الحاجة الوحيدة الحلوة اللي فى حياتى

نعيمة: خلاص .. يبقى نرجع يا حسن

المتهم: نرجع فين ولمين ؟

نعيمة: لأرضك يا حسن

المتهم: مابقتش أَرْضِي يا نعيمة
نعيمة: والزرع اللي زرعه بإيدك ؟
المتهم: خيره مابقاش ليْنَا .. صدقيني .. كل حاجة في البلد مابقتش ليْنَا..
نعيمة : أنا مش مصدقة اللي بتقوله
المتهم: ولا أنا .. اللي بيفتح بقه يتسجن أو بيموت
نعيمة: ماكنتش بتخاف من الموت
المتهم : مش الموت اللي مخوفني .. مُت .. الناس هتعملني إيه .. بطل ؟ .. رمز ؟ ..
طب والنور .. الحلم مين هيكمله ؟
نعيمة : إتغيرت يا حسن
المتهم: قصدك عقلت .. زى كل الناس ما بتقول
نعيمة : الناس بتقول إن معاهم العدل والخير .. أصدقهم ؟!
(يهرب منها ويأخذ جانب)
نعيمة : (تذهب لمواجهته) .. أصدقهم يا حسن ؟
المتهم : (يضع رأسه في الأرض)
نعيمة : يعنى معاهم العدل والخير ؟
المتهم : (بانكسار) أيوة
نعية : أيوة إيه ؟
المتهم : معاهم الـ .. الـ ..
نعيمة : معاهم إيه يا حسن ؟!
المتهم: الـ ع د ل .. والخير
نعيمة : إنت مش حسن
المتهم : (بغضب وبكا) أنا مش عايز أكون حسن .. مش عايز .. أنا مابقتش عايز أكون
حد .. أنا مش عايز أعيش وسط الناس .. (يتفقد المكان بحب) .. هنا المكان أجمل من
أى حياة .. هنا الحقيقة الوحيدة .. وسط الأموات والسكون .. وسط أصحابي اللي كانوا
شايفين معايا النور .. غير كدة .. أنا مش عايز حاجة .. مش عايز

(يجلس بجوار أحد القبور ويكتب على الشاهد " عيش حرية عدالة اجتماعية " تكتمل
الجملة مع بداية الإظلام)

(تقترب منه نعيمة أثناء الكتابة _ ثم تنسحب للخلف وتخرج من المسرح)

إظلام تدريجي

اللوحة التاسعة عشر

(يدخل الضابط فى خطوات إنكسار .. يبكى مع أغنية "يا عينى يا عينى يا عينى ع
الوله " _ يجلس حزينا _ ثم يتمالك نفسه _ يمسح دموعه _ ثم بعد لحظة)

الضابط : (متداركا) .. يا نهار اسود .. يا نهار اسود

(يرجع لنفس مكان الدخول سريعا)

الضابط : (ينادى) إنت يا عسكرى يا غبى .. إنت يا غبى

(يدخل العسكرى يتثائب ويفرك عينيه فى هدوء)

العسكرى: (فرحا) صباحية مباركة يا سعادة البيه

الضابط : صباحية إيه الله يخرب بيتك .. إنت نمت ؟!

العسكري: (بإيحاء) ما انت كمان كنت نايم يا بيه

الضابط : إخرس.. مش عايز أسمع صوتك .. (يضرب كفا بكف) زمان الناس جت وقعدت وحششت .. والحرامية سرقوا كل الجثث .. (بغضب) .. وإنت نايم

العسكري: يعنى هو سعادتك اللى كنت بتلعب يوجا .. ما إنت كنت نا..

الضابط : (يقاطعه) مش عايز أسمع صوتك .. ضيّعنا قضيتين طازة من إيدنا

العسكري : خلاص بقى يابيه ربنا يعوضنا .. طول ما نيتنا سالكه ربنا مش هينسانا..

الضابط : طب هنقول ايه لحسن بيه وخيرى بيه ؟ أكيد هيعرفوا ويشمتوا فينا

العسكري : وهما هيعرفوا منين يا بيه .. إحنا ندارى خيبتنا وخلاص

الضابط : طب شوف البوست اللى كتبناه على صفحة الفيس .. لو ماحدش شافه .. إغيه .. ويا دار ما دخلك شر

(العسكري يفتح النت على الموبايل ويتفقد الصفحة)

العسكري : (صائحا) يالهى .. يالهى .. يا لهى

الضابط : (فزعا) فيه إيه؟

العسكري : إلحق يا بيه .. دى الوزارة كلها عرفت .. وسيادة العقيد .. وسيادة اللواء .. (ثم صائحا) والوزير نفسه معلق على الصورة وعامل كومنت

الضابط : (يلطم وينوح كالسيدة التى فقدت زوجها) يا نهار إسود .. طب والحل .. هنعمل إيه ؟ .. إحنا كدة رحنا فى داهية

العسكري : إهدى يا بيه إهدى .. ما تعملش فى نفسك كده .. كل حاجة وليها حل .. خليك مؤمن

الضابط : (غاضبا) ما تجيبش سيرة مؤمن أنا زملكاوى .. وقولى هنعمل إيه فى المصيبة دى ؟

العسكري : (بهدوء شديد) ولا مصيبة ولا حاجة .. إحنا نمسك أى حد واحنا مروّحين .. وناخده القسم .. ونلبسه القضية .. " ولا من شاف ولا من درى "

الضابط : (مستدركا) .. تفتكر ؟

العسكري : (يمشى بخطوات واثقة ويجلس ويضع قدم على قدم) .. طبعا يابيه ..
ولما يكتشفوا إنهم ناس بريئة .. يبقى يحلها الحلال .. المهم إن إحنا عملنا اللي علينا
وقبضنا عليهم .. وكتبنا المحضر .. وخذنا المكافآت وخلص

الضابط : حلوة الفكرة دى .. (ينبهه) بس عايزين ناس غلبة عشان مايعملولناش
قلق

العسكري : يا بيه كل الناس غلبة .. وماشييين كأنهم مسطولين من كتر المشاكل
متعرفش تفرق بين اللي شارب حشيش واللى عليه ديون

الضابط : حلو أوى ..

العسكري : (يقف) .. مش هيبقى قدامنا غير الجرز هو اللي مشكلة

الضابط : آاه صح وهنعمل إيه فى الجرز ده ؟

العسكري : ساعتها نقول أى حاجة .. نقول مثلا إنهم رمو الحشيش واحنا بنجرى
وراهم ... وبالنسبة لحرامية الجثث نقول إنهم مالحقوش يطلعوا الجثة من التربة

الضابط : نكذب يعنى ؟

العسكري : بيضا يا بيه

الضابط : هى إيه دى اللي بيضا

العسكري : الكدبة يا بيه .. كدبة بيضا

الضابط : لا لا .. أنا لا يمكن أكذب .. أنا أخلاقى ماتسمحلش بكدة أبدا .. (متداركا
) .. إحنا لازم نجيب لهم حشيش وجثة

العسكري : إزاي يا بيه ؟

الضابط : (يمشى بخطوات واثقة ويجلس ويضع قدم على قدم) .. إزاي دى بتاعتى
أنا .. إنت فاكّر إن الطبوطية بالساهل

العسكري : بس كنت عايز أستفيد من خبرة سيادتك وأتعلم منك

الضابط : إذا كان كدة يبقى ماشى .. مش خسارة فيك .. بص يا سيدى .. عارف
مخزن التليفقات القديم ؟

العسكري : إيوه يا بيه طبعا

الضابط : هتلاقى فيه كام حطة حشيش كدة شايلينهم لوقت عوزة .. هناخد حطة صغيرة .. ونعملهم قضية تعاطى

العسكرى : ما ناخد كام حطة كبيرة .. ونعملهم قضية إتجار

الضابط : (يقف) .. غبى .. لما بيقى تعاطى يخرج بسرعة .. ويبقى ليه سابقة ونقدر نستفيد منه بعد كدة فى كذا حاجة

العسكرى : يا سلام يا بيه على الأفكار الجهنمية .. (يفكر لحظة) .. طب وبالنسبة لحرامية الجثث هنعمل إيه ؟

الضابط : فاكّر جثة المسجون اللى مات من التعذيب من كام شهر .. وماحدث عرف عنها حاجة

العسكرى : بس دى فى المشرحة وماحدث إتعرف عليها لغاية دلوقت

الضابط: ما تقلقش من الموضوع ده .. المهم إننا هنتصرف .. إطمئن

العسكرى: ربنا يطمئن قلبك يا بيه .. الحمد لله .. أهو ربنا رزقنا

الضابط : (بإيمان) ويرزقكم من حيث لا تحتسبوا

العسكرى : (يخرج سبحة) .. ونعم بالله .. يالا يا بيه بقى عشان نلحق نصلّى الفجر حاضر

الضابط : توكلنا على الله

(يخرجان)

اللوحة العشرون

(يدخل المحششين يتقدمهم شلبي لتفقد المكان فى قلق وخوف ومعم الأكل
والmp3)

شلبي : (بإطمئنان) .. خش يا إبني انت وهو متخافوش .. مافيش حد هنا خالص ..
ولا عفاريت ولا بنات ريا وسكينة .. قال عفاريت تطلع تتكلم معاكوا قال (يضحك
(

محسن : لا يا عم أنا شوفتوا وإتكلم معايا

شكشك : آه وأنا كمان شوفتوا وكان جاييلي كوبيتين شاي .. وقعد يقولي كلام غريب
مفهمتش منه حاجة

شلبى : (يضحك)

محسن : نفسي أعرف بتضحك ع إيه ؟ ما إنت كانوا البنات هيغتصبوك ومش
بنضحك عليك ولا حاجة .

شكشك : هو إحنا كل ما نجيب سيرة العفاريت هيقد تضحك

شلبى : (يضحك) آه

محسن : خلاص يا جدعان .. سيووكوا من السيرة دي .. أنا جايب كل حاجة معايا
أهو .. الأكل والصب وكل حاجة جاهزة
(يفرش على الأرض ويجلس)

شكشك : وأنا هعملكم السندوتشات

محسن : أنا عايز واحد جبنة و واحد حلاوة طحينية

شلبى : وأنا عايز واحد جبنة و 2 حلاوة طحينية

شكشك : لا إنتوا هتأمرؤا عليا .. أقسم بالله أرمي الأكل .. ومحدث هيطفح حاجة
كلنا هناكل زي بعض ومحدث هياكل حاجة غير التاني .. (ل محسن) إنت واحد
جبنة وإثنين جبنة .. (ل شلبى) وإنت إثنين جبنة و واحد جبنة .. وأنا واحد حلاوة
وإثنين حلاوة

شلبى : طب إعمل حساب واحد صاحبي معاك .. هو جاي ف الطريق وإتسحل فى
كام حوار كدة (يضحك) .

شكشك : خلاص هعمل حسابه فى 3 سندوتشات جبنة .. وبكدا قسمة العدل وبما
يرضى الله .

(يدخل مديح .. يرمى السلام .. محسن وشكشك يخافون بينما يقف شلبى ويسلم عليه
ونكتشف أنهم أصدقاء)

شلبى : إيه يا إبنى إنت إتأخرت كده ليه ؟

مديح : لا يا عم ما إتأخرتش ولا حاجة .. أنا هنا من بدري وشوفت صحابك
وإشتغلهم أحلى إشتغالة

(شكشك ومحسن يتابعان الحوار فى غضب بعد معرفة الأمر)

شلبى : آه ما هما كل ما بيحكولي بضحك

شكشك : (يذهب لمديح) مقبولة منك يا عم الشبح

محسن : (باستغراب) يعني إنت مش عفريت ؟!

شلبى : عفريت إيه يا إبني دا صاحبي .. وإشتغلکم أحلي إشتغالة

مديح : خلاص بقي قلبكم أبيض .. (ل شلبى) بلاش تسخن إنت بس

شكشك : مقبولة منك .. هات بقى الفلوس اللي خدتها منى .. وتعالى كُـل .. عملتلك
2 جبنه و واحد جبنه

مديح : لا لا مش وقت أكل .. فيه حوار لازم نتصرف فيه

شلبى : خير ؟

مديح : أنا لما لقيتكم إتاخرتوا ودول خافوا وجريوا .. قلت أريح شوية لغاية لما
تيجوا .. لقيت ناس جاية تسرق جثث .. إفتكروني جثة

محسن : وعملت إيه ؟

مديح : إشتغلتهم هما كمان .. لقيت الدكتور اللي معاهم بيتكلم عن الموسيقى
والأموات وحاجات مافهمتهاش .. وجم شغلولي أغنية وخرجت معاهم وتوهمتهم ..
ورجعتكم .. بس أكيد هيبجوا تانى

شكشك : (يتركهم ويجلس على الملائة المفروشة) .. يا عم إحنا مالنا .. إحنا
جايين هنا نريح دماغنا .. أكل وأغاني وحشيش مالناش دعوة بقي يسرقوا .. يبيعوا
.. (بتأكيد) مالناش دعوة

شلبى : مالناش دعوة إزاي ؟ .. إحنا لازم نبلغ عنهم البوليس

محسن : (مستدركا) .. طب ما كدة البوليس هيقبض علينا إحنا

شكشك : ولا بوليس ولا حاجة .. إحنا نروّق دماغنا وخلاص .. (بنبههم) مالناش
دعوة

مديح : يا صاحبي إعتبر الجثة اللي هيسرقوها دي جثة جدك

شلبى : أو ستك ؟

محسن : او جدك الثانى

شكشك : جدي الثانى ؟ .. (يقف) لا كله إلا جدى الثانى .. كله إلا جدى الثانى

(تدخل أم كالوشة بهدوء .. يكتشفون وجودها فجأة فيقفوا فى حالة خوف وثبات لا يتحركون)

أم كالوشة : سلامو عليكم يا حلوين

الجميع : (يردون السلام فى خوف ورعب وقلق) وعليكم السلام

أم كالوشة : عاملين إيه يا قطايط ؟

مديح : جدك الثانى صحى يا ضحك (يضحك)

(تنظر أم كالوشة له فيصمت تماما)

أم كالوشة : (تتحرك وتتفحصهم) بالصلاة ع النبى كدة .. مين البهوات ؟

مديح : أكيد إحنا القطايط اللى لسة قايلة عليهم من شوية ههههههه

(ثم يتوقف عن الضحك فجأة عند نظرها له)

شكشك : (بلبلجة وخوف) إحنا جايين نزور جدى .. إنتى اللى مين ؟

أم كالوشة : أنا خالتك أم كالوشة

محسن : أم كالوشة مين بقى دى ؟

شلبى : أم كالوشة اللى ماتت مشنوقة وغير كدة ماتت محروقة

شكشك : اليوم باين من أوله يالا نجرى يا جدعان (ولكنه لا يستطيع الحركة)

أم كالوشة : إنُبت يا ض إنت وهو .. إلا قولى بقى يا قطقوط (ل مديح) هو إنت اللى كنت بتتصل بيا وتقولى حضرى برمىل شاي بمية نار .. وتعاكسنى فى التليفون ؟

مديح : (لشلبى) الله يخرب بيتك .. إنت اللى قولتلى أشقظ بنت من الفيس وآخذ رقمها ؟

شلبى : (مستغربا) هى دى " لولا لالو " اللى حاطة صورة نانسى عجرم ؟

مديح : أهى طلعت عجرم أهى

شكشك : (يحاول التحرك فى هدوء) .. طب يالا يا جماعة عشان أنا مستعجل .. سلام

محسن : وأنا كمان عندى مشوار مهم .. (ل شكشك) .. يالا بينا

شلبى : وأنا عندى ميعاد مهم .. وغير كدة عندى ميعاد مهم

أم كالوشة : إثبت يا ض إنت وهو .. إثبت

(يثبتون ويعودوا لأماكنهم فى خوف _ تتحرك أمامهم أم كالوشة كقائد عسكرى يعطى الأوامر وهم ينفذون الأمر)

أم كالوشة : إنتباه .. صفا .. إنتباه .. صفا (ثم تنادى) بت يا كالوشة .. يا كالوشة (تدخل كالوشة)

كالوشة : أبوة يا أماااه

أم كالوشة : تعالى يا بت إختارى عريس من العيال دى بسرعة ؟

(كالوشة تقفز من الفرحة بينما هم فى حالة هلع وثبات إضرارى ورعب)

(تتحرك كالوشة بينهم وتتفحصهم .. بينما كل منهم يحاول أن يظهر عيوب فى شكله)

كالوشة : (تمسك ب شكشك وتختاره) .. هو ده عريسى يا أمااااااه

شكشك : إنا لله وإنا إليه راجعون

(يقومون بتعزيته .. بينما هم فى حالة فرح لهروبهم منها ولم يتم إختيارهم)

مديح : البقاء لله .. ربنا يجعلها آخر الاحزان

محسن : شد حيلك .. كلنا لها

شلبى : كنت عايز أقولك مانجيكش فى حاجة وحشة بس واضح إننا جينا خلاص
(يهمون بالخروج)

أم كالوشة : إستنى ياض إنت وهو .. هو إيه ؟ دخول الترب زى خروجها .. هو أنا
كمان مالبيش نفس أتجوز .. أنا كمان هختار عريس
(يقفون فى رعب وبكاء وخوف بينما تمر أم كالوشة لتتقدمهم)

أم كالوشة : (تختار شلبى) هو ده عريسى .. وغير كدة هو ده عريسى
(يخرجون فى إحتفال وزفة مع الزغاريط والمزمار شلبى وشكشك فى حالة حزن
تام وبكاء)

اللوحه الحادية والعشرون

(يدخل حرامية الجثث يرتدون ملابس البحر .. مايوهاات .. طوق بحر ..
نظارات وملابس غوص وجهاز التسجيل أو ال mp3)
خشبة : (ممسكا بسنارة) .. بقولكوا إيه ... المرة دى سييونى أتصرف أنا .. أنا
خبرة مع الجثث وعارف طرق كتير تخلينا ناخدها ونمشى على رواقه
مشروط : أنا مش عارف ليه واجعين دماغنا مع الجثة دى .. ماناخذ أى جثة
وخلاص .. وبلاش شغل المواصفات والجودة ده .. إحنا مش بنصدر علب تونة

الدكتور : لاااااا .. الجثة دى فيها المواصفات المطلوبة نتيجة الفحص بتاعى ..
وأنا همضى على الورق .. وأنا ما أسمحش بإن سمعتى تبوظ فى الوَسَط

خشبة : فعلا .. أحمد السقا يقول عليه إيه ؟

مشرط : سمعة إيه بس وأنهى وسط ده ؟ اللي ماحد عارفك شغلانة من ساعة
ماشفتك .. بقولك إيه .. أنا مخنوق منك من ساعة ما لبستنى المايوه ده

الدكتور : ماله المايوه ؟ مايوه أصلى ويخليك تطفو على وش المياه من غير
مجهود .. مش كفاية إنى سرقتلكم ؟

مشرط : (بتعجب وإستناكر) إنت كمان حرامى ؟

الدكتور : على أساس إنكم بتبيعوا سبوح فى الحسين .. (لمشرط) بقولك إيه ؟

الجثة دى همسكها يعنى همسكها .. أنا مستقبلى المهنى والوظيفى والأكاديمى فى
خطر

خشبة : بطلوا بقى .. أهم حاجة ماتنسوش إحنا رايعين مصيف بلطيم .. هننقع
الجثة إنه صاحبنا وناخده معانا

مشرط : ما كان فى إيدنا .. لازم يعنى الأغنية تفصل منك وتقف الموسيقى

الدكتور : إنت اللي كنت مسئول عنه وهرب منك وتوّهك

خشبة : يا جماعة خلاص .. الجثة كان باين أوى إنه عارف حاجة .. وتحس إنه
كان عارف إننا بنشتغله

مشرط : طب ما لو ده صحيح يبقى هيعرف إننا مش رايعين مصيف وإن إحنا
بنشتغله برده تانى

الدكتور : ماتقلقش من الموضوع ده .. ذاكرة الجثث زى ذاكرة الزرافة بالظبط
.. يعنى أكيد نسى

خشبة : أنا أهم حاجة عندى ما أتمسكش باللبس ده .. ساعتها هعتزل المهنة
وهشتغل موظف حكومة

مشرط : طب هنعمل إيه دلوقت ؟

الدكتور : هنشغل الأغنية .. ييجى العفريت .. نقنعه إنا طالعين مصيف وإنه
ييجى معانا بلطيم

مشرط : (معترضا) بس أنا مش عايز أروح بلطيم .. أنا بحب جمصة

الدكتور : (بغضب) جمصة إيه وبلطيم إيه ؟ .. يو آر إستيوبت آند كرازى

مشرط : (ينفعل ويخرج مطوة) هو بيغلط ؟

خشبة : آه بيغلط بقى .. عشان إنت خنقتنى من أم الشغلانة دى ومن عصبيتك
طول الوقت .. وببشتمك وانا شايف إنه عنده حق .. هتعمل إيه يعنى .. ورينا
هتعمل إيه ؟

مشرط : (يرجع الموطوة مكانها) .. ربنا يسامحكم

خشبة : طب شغل بقى الأغنية خلىنا نخلص

(تشتغل الأغنية الشعبى .. يرقصون وينتظرون مديح .. بينما يدخل عليهم
التربى فيجدهم يرقصون)

التربى : (مستغربا) الله الله الله .. إيه ده ؟! بتعملوا إيه يا ض إنت وهو
ياض ؟

مشرط : - بند بند

خشبة : (يلحقه فى الكلام) بنلعب رياضة

التربى : رياضة إيه يا ض إنت وهو ؟ .. وإيه اللبس الغريب ده .. إنتوا
عايزين قلة أدب ولا إيه ؟؟

الدكتور : لا لا ... أنا ما اسمحكش

التربى : أمال مين يا ض اللى بيسمح فيكم .. شكلكم كده مش مريحني .. ()
لمشرط : .. خد يا ض إنت

مشرط : أنا !!؟؟

التربى : أيوه إنت .. أنا عارف إنك اللب اللى فيهم

مشرط : (يذهب إليه فى خوف) أيوه يا عمو .. والنبي ما تضرب

التربى : مش هضربك ما تخافش .. قولى يا حبيبي .. رايعين فين ؟؟)

مشرط لا يرد) .. قول ما تخافش

مشرط : (بفرح) رايعين مصيف

التربي : مصيف !؟ دا إنتوا ليلتكوا سودة .. مصيف .. (يمسكه من قفاه) ..
أنا ياض مش جاييك من على سور الترب 3 مرات قبل كدة !؟

مشرط : حصل

التربي : (لخشبة) وإنت يا خشبة مش المفروض تفهمه وتوعيه ؟
خشبة : دا أنا مش سايبه يروح في حته .. هو الدكتور اللي قاله هطلعك
مصيف

التربي : دكتور !؟ .. (يذهب للدكتور) وبالصلاه ع النبي إنت بقيت دكتور
كمان .. بأمانة إيه !؟

الدكتور : (يخرج له سماعة طبيب) إشتريت سماعة أهى
التربي : سماعة !؟ .. (بغضب وتوعد) .. الكلام ده مش لازم أسكت عليه
.. إسمع ياض يا " ميت " إنت وهو (موسيقى مفاجأة) .. إنتوا حدودوكم
سور الترب وبس .. ويوم ما أبحبها شوية .. هيبقي كوبري السيدة عيشة ..
أنا سايبكم هنا براحتكم .. والمقلب اللي عملتوه فيا مش هيعدى بالساهل ..
مافيش مَيِّت هنا هيتحرك .. أنا مش حارس أونطة .. واسمعوا بقي الجديد ..
(يتحرك مشرط في خوف لينضم للدكتور وخشبة في حالة خوف)
التربي : أي حد هيحاول يخرج من هنا مش هرجعه تانى .. الكلام ده مش
ليكم بس .. ده لكل الميتين اللي هنا ..

(يمر في كل أرجاء المكان) .. إصخوا .. إظهروا هنا .. إظهروا
(يدخل كل شخصيات المسرحية شهريار وشهرزاد الطابط والعسكري
الحشاشين والحرامية .. البنات .. الإخوات .. ام كالوشة وبنتها ... إلخ _
يتابعون الموقف وينظرون لبعضهم البعض) ..

الجميع : (كراودت .. خير فيه إيه ؟ إيه اللي حصل ؟)
التربي : (يقف فوق الشاهد الرئيسى ويشير لهم بالهدوء)
التربي : الكلام اللي هقوله ده تسمعه كويس أوى .. ونفهموه كويس جدا ..
أنا سايبكم براحتكم .. تعملوا اللي تعملوه .. لكن وقت الجد ما عنديش حد
أحسن من حد .. الطابط زى الحرامى والغلبان زى الملك .. هنا كلكم زى
بعض .. كلكم متقيدين هنا غصب عنكم .. محدش يفكر إنه ممكن يبقي حر
.. الحرية دى تبلوها وتشربوا ميّتها .. مش كل شويه واحد يقولى (يقاد
شلبى) : أنا نفسي أخرج من هنا .. وغير كدة نفسى أخرج من هنا .. واللى
زاد وغطى اللي يقولى (يقاد مشرط) : رايجين مصيف ..
لاااا الكلام ده فى مكان غير هنا .. هنا تعمل كل حاجه غصب عنك ..
ملكش إختيار .. تاخذ على دماغك وترضى وتمشي جنب الحيط ...

الجميع : (همهمات اعتراضية)
التربى : (بتأكيد ووعيد) واللى هيفكر يعترض .. ولا يفتح بقه .. هدخله
تربته وأقفل عليه وأريح دماغى ..
(ينزل من فوق المقبرة (الشاهد) ليمر من خلالهم)
التربى : وبعدين أنا بعمل كدة ده عشان خاطر مين ؟ .. ماهو عشانكم إنتم يا
ميتين .. عشان مصلحتكم .. عشان الترب اللى بتضمنا كلنا .. الترب اللى
خيرها علينا .. مافيش واحد ميت هيبقى أعلى عندى من الترب .. أنا بقول
أهو .. مافيش واحد ميت هيبقى أعلى عندى من الترب .. تحيا الترب .. تحيا
الترب

(موسيقى حزينة _ يخرج الجميع فى حالة حزن كبير بينما يتبقى على المسرح ..
شهریار الذى يجلس على المقبرة وشهرزاد تقف بجواره)
شهرزاد : (باستغراب) الكلام اللى سمعته ده صح ؟!

شهریار : (بحزن) أيوة يا شهرزاد

شهرزاد : (بحزن) يعنى إحنا هنفضل طول عمرنا هنا .. فى الضلمة ؟

شهریار : دى حقيقة كل شئ يا شهرزاد .. كل حاجة وليها نهاية .. الحوادث ليها
نهاية وإحنا كمان لينا نهاية .. بس الروح دايمًا موجودة فى إنتظار المصير

شهرزاد : والقصر ؟

شهریار : (يقف) مافيش قصر يا شهرزاد

شهرزاد : والفساتين والماكياج

شهریار : كانوا مرحلة .. وناس تانية هتستفاد بيهم .. زى ما إنتى كنتى بتغيرى
الفساتين .. الفساتين كمان بتغيرك وتروح لحد تانى

شهرزاد : (تقترب منه وبخوف) أنا خايفة يا شهریار

شهریار : بعد الموت مافيش خوف غير من المصير .. أنا سامع صوت حد جاى ..
يالآ نرجع قبل ما حد يحس بينا (يخرجان)

إِظْلَام تَدْرِيجِي

سِتَار

المؤلف

هاني عبدالرحمن مهران عبدالحميد

كاتب ومخرج مسرحي

للتواصل :

Hany_mahran@hotmail.com

www.facebook.com/hany.mahran.7

ت / 01228951987 / 01116206053